

三續高郵州志卷四

人物志上

列傳 忠烈 孝行 政事 文苑  
武略 獨行 義行 篤行 藝術

列傳

元董元善名原良以字行父質甫原籍秣陵爲武昌教授罷官後遷居高郵元善其長子也至正壬辰以學行才能薦除南陽府知府有惠政郡人悅而化之先是劉福通據平臯攻舞陽葉縣元善至固守兩縣克復平臯寇不敢犯南陽癸巳中原大亂張士誠破高郵明年官軍復之值元善棄官歸與弟旺剛集眾保障鄉邦十餘年明祖建號元善退隱神居山中杜

三續高郵州志卷四

列傳

一

門絕客洪武中以賢良方正徵守江西之南昌元善以疾辭不起遂幅巾藜杖優游田里以終年七十四人稱爲嵩山先生子五人其季璘仕明以文學顯前

志有傳

採董氏家乘

清夏子錫字路門一字鑾坡鄉賢之芳玄孫幼而岐嶷風度端凝能危坐終日無倦色邑耆老高德慶深器之遊庠後究心實學問業於宋茂初及族祖寶晉因邃於經史且通天文輿地金石之學咸豐壬子舉於鄉歲暮州牧贈以漕規卻之明年南宮報罷遂館京十年與南皮張之洞江夏何金壽等齊名癸亥成

進士殿試二甲第二名欽典庶常尋授編修戊辰大  
考二等恩賞緞匹丁卯主試山西覆命入京與前輩  
錢桂森創設養根文會瑞安黃紹基閩縣王仁堪皆  
所造就者也庚午授四川學政刻韻辨附文捐廉印  
御纂九經殿本四史通解各學以資觀摩癸酉逢拔  
萃科不循故事收厚贄專務振拔單寒故是科朝考  
閱卷大臣咸以川省文風優異請旨破格多用四人  
時朝政漸弛子錫度不能伸其志任滿謝病歸年猶  
未及五旬後左文襄過訪李文忠函招皆不出居家  
閉戶讀書惟事關地方利害有司造門而請乃出而

### 三續高郵州志卷四

列傳

二

剴切指陳性極友愛弟兄五人從無疾言遽色至今  
子孫猶聚族而居里有木工詈其父子錫聞之曰吾  
輩士人忝居四民之首而化不及於比鄰是吾過也  
召工來爲講大義終日工泣下由是善事其父其感  
人類如此生平學以漢儒爲宗嘗手批十三經廿四  
史朱墨爛然又總纂再續州志一從實錄著有讀經  
雜誌讀史雜誌養根書屋詩文稿待梓年七十一卒  
於家

楊際春字鳳山先世溧水人祖崇文以市藥遊高郵  
因家焉際春生而家貧無力延師六齡始就義塾塾

師賈鶴慶愛其聰穎極力培植之不數年諸經成誦  
爲文斐然可觀兼工詞賦值粵氛方熾本省停考際  
春藉傭書訓蒙以養母嘗在館見東道奉饌豐腴作  
酸心詞自責曰今日魚佐餐明日肉佐餐魚肉味美  
中心酸高堂有母一飯難爾魚餐爾肉餐讀者哀焉  
咸豐七年考試復行乃入郡庠同治丁卯舉於鄉是  
冬捻匪過境際春率紳董協力防守城乃獲全戊辰  
聯捷南宮點庶常留授檢討光緒丁丑晉豫大旱際  
春馳書魯撫勸籌五千金賑之明年畿輔災饑民麇  
集又偕同年劉曉瀾應詔陳言條上八事請於淮鹽

### 三續高郵州志卷四

列傳

三

籌款賑饑並與京尹梁肇煌編修何金壽等籌辦賑  
饑地八所創立公善堂勸捐施賑全活無算在京供  
職十年肆力於古文詞作駢散各體皆有家數寓居  
蕭寺日手一編視榮利泊如也終以不嫻奔競未遷  
一階值母年高乃乞終養回籍適左文襄公督兩江  
薦主講板浦敦善書院諸生經其指授咸中法程時  
法蘭西開釁越南閩桂交警際春上書文襄請固拒  
法人求償兵費並條陳和諸國擢將材專寄託三策  
文襄躉之生平篤於師友感賈師恩歿後輔翼其子  
子歿厚恤其家並歲時爲位以祀之同學少年有一

言一行之美咨賞不輟律已甚嚴館穀外非道非義一介不取年五十八卒以弟子庠生立瀛爲後際春喜著述立瀛早歿稿皆散佚梓行者祇澹雲山房詩草一卷

楊福臻字駢卿號聽梧祖觀壽父紹炯皆博學能文爲名諸生福臻明敏純篤遊庠後以家政付弟一意下帷發憤同治癸酉舉於鄉光緒庚辰成進士欽點庶常留館授檢討兩次京察一等記名道府久之補山東道監察御史轉掌河南貴州陝西福建各道遇事直言不避權要甲午之敗抗疏請誅葉志超以爲

### 三續高郵州志卷四

列傳

#### 四

逃竄罪小欺罔罪大志超捏報戰功誑蒙優賞由是諸軍以逃竄爲得計遂致朝鮮全棄內陷遼東推原禍首非彼而誰又請將潰敗諸將立正典刑勿稽顯戮朝廷從之由是軍政肅然又見仕途混雜吏治窳敗因上疏曰方今臣工積習約有三端平時優游容與粉飾彌縫但顧目前絕無遠慮政治之張弛民生之休戚漠然不關於心猝有事變束手無策此因循之習也以入仕之途爲致富之券揣缺分之肥瘠計入歛之盈虛其初挾商賈之心以趨仕宦之路繼握仕宦之柄以濟商賈之貪終擁仕宦之資歸謀商賈

之業始起於捐納之員繼染及讀書之輩利欲薰心  
公言無忌此貪婪之習也閱歷既深趨避遂熟同流  
合污保全富貴依阿以圖見好枉法以庇私人甘心  
貽誤國家不肯怨及朋友遇事模稜毫無建白此周  
旋世故之習也此三者或人各有其一端或一人兼  
此數習迭起循生熟極生巧耳濡目染併爲一談因  
此三習遂生六弊封疆大吏百僚之表率也膺此選  
者不以爲艱鉅之任而以爲安樂之窩接屬吏則惟  
諂諛是悅派委署則以愛憎爲心但使京中有調護  
之人則高位爲久據之物既無正身率下之能安有

### 三續高郵州志卷四

列傳

### 五

認真察吏之事司道以下奔走承順唯恐不及且從  
而效尤焉一切公事安得不廢則弊在吏治自粵匪  
平定以來民氣未復惟賴良有司加意撫循而事困  
於鈐縛力竭於逢迎潔清自好之官不得久於其位  
狡黠者轉恃上官爲護符以小民爲魚肉任意妄爲  
抑冤莫訴則弊在民生各省軍營由提鎮以至千把  
不以訓練爲務遇該省大吏閱兵但製號衣以飾外  
觀僱乞丐以充缺額至士卒之甘苦將弁不知也將  
弁之勇怯統帥不知也恭閱邸鈔見各督撫校閱後  
所奏大率云技藝嫻熟步法整齊一似天下無一省

無一營不爲勁旅何以一經徵調臨陣卽逃可見校閱竟成具文惟聞刻待兵勇剋扣軍糧是其慣技如今年劉坤一奏叅之宜貴勒免閱操費嵩蕃奏叅之曾紹枚張顯福崔金斗剋扣口糧王文錦奏叅之羊洪順不給四成米價是也士卒不能一飽安望其捨命殺敵哉則弊在軍政國家歲用浩繁必期核實乃遇有公項自內及外自上及下層層扣減人人分肥相沿成例視同恆產各護其私無從發覺各省釐局道府以下視爲優差鑽營把持無所不有苛勒侵吞大吏未能覺察但圖安置私人而已各邑積穀捐自

### 三續高郵州志卷四

列傳

### 六

民間以備荒歉乃日久月深消歸無有一遇水旱仍須另籌賑濟至於州縣虧欠致被叅追入告之章罪難悉數則弊在國用十八省之大豈無異材祇以小人道長忝竊踰分一遇異已非形其短卽妨其私因而多方阻抑百般傾擠或僧其耿介而陰掣其肘或忌其聲望而故靳其權其身膺重任者皆軟媚油滑之徒以致倉猝之際文無可任之官武無可恃之將則弊在人才自來國家之敗全由官邪我朝澄敘官方何嘗不認真察覈無如積習相沿不肯破除情面故每奉特旨查辦之件率皆以查無實據覆奏其盡

心者亦不過擇其官之小罪之輕者奏叅一二以了此案總由意存見好卽爲自己他日飭法冀人容隱地步植黨營私互相袒庇習深氣固牢不可破法令之設視若弁髦則弊在刑章凡此諸弊皆由因循貪婪周旋世故而來在昔爲隱憂在今已成顯患在小官則害一邑在大員則害及一省甚至害及天下草野之民知有今日久矣若非力改其故習雖兵艦多於敵人鎗礮猛於敵人機器靈於敵人算學精於敵人恐一旦有變委而去之猶今日也然則今日不患無法患無人而已何以得人明賞罰而已自古大法

### 三續高郵州志卷四

列傳

七

而後小廉崇直必先去枉況今日積習已深不震動耳目無以變易其心思譬之病已深錮必得峻劑乃足立起沉疴時際陰霾必有迅雷乃可宣暢幽鬱疏上天子傳諭樞臣布告天下俾內外大小臣工惕然振作時各省州縣設立待質公所差役據爲利藪苛虐萬端訟案牽連人證及罪輕人犯在所隕命者歲無算福臻揭其弊條奏數千言大旨謂監禁以待罪人而無罪之拘留苦更加於監禁刑具自有定式而無刑之凌虐酷彌甚於施刑疏上得旨嚴禁海內稱之其他如請飭各州縣革除總董各大吏勤見僚屬

慎選人材嚴懲貪吏諸疏皆切中時弊戊戌政變朝廷詔重要臣僚簽註校邠廬抗議以備採擇福臻就原議中分別與駁持論獨見其大以語多不悉載福臻生性沖和處家庭鄉黨間及臧獲下人未嘗以聲色相加而於詰暴除姦及遇重要事件則反覆辯論不遺餘力嘗以去就與臺長爭是非同僚羣服其膽既而巡視東城北城皆秉公判決案無留牘境無冤民復奉命抽查漕糧相沿陋規可數千金概屏弗取任畢皇太后召見溫語褒嘉蓋深知其廉也閱數歲轉兵科給事中見朝右泄沓愈甚知天下事益不可

### 三續高郵州志卷四

列傳

### 八

爲遂乞假歸生平與弟福申友愛甚篤福申先卒子蕃年幼福臻視如己子教之成名解組後於宅東購地數畝結茅屋數椽歌嘯其中光緒末卒於家年七十有三著有漢書志疑漢書通段字攷漢郡守分郡攷欵竹軒詩存享帚詞竹屏詞蕉夢詞匏居集燕市醉歌灌畦餘興等集待梓子七人兩成進士一登鄉榜餘亦有聲庠序皆秉父教而成故郡人士談善教子者推楊氏爲最云

人物志

忠烈

清潘藝字譽六爲人言行不苟遇有鬪者婉解之見有急者必周之能詩善畫尤精醫術咸豐中粵匪肇亂其姪婿王啟秀知鳳陽府事憂亂成疾迎藝醫治藝至城已被圍乃單騎入賊壘勸諭反正賊攢矛刺之戕焉里人哀而誄之曰介烈先生

董桂鑿字子馨號朗山工駢文遭洪楊之亂未及應試遊幕郡城因從官軍擊賊城陷爲賊所執不屈見殺年甫二十五後由本省大吏上聞奉旨卹予雲騎

三續高郵州志卷四

忠烈

九

尉世職

張兆煦字春陽公田張家莊人咸豐戊午在揚州遇賊投河殉難事詳府志

張兆楷字端書張家莊人寓揚州咸豐戊午賊陷郡城楷殉難

張兆樹字茂村公田鄉人咸豐癸丑戰賊於山西曲沃之野陣亡

車元熙字伯起晚年自號臥松世居臨澤鎮年幼卽勤學弱冠食餼文譽藉甚居鄉成就生徒甚眾淡於進取四十後卽不應鄉闈與弟成熙友愛甚篤熱心

公益几有便民生之事皆竭力進行鎮有大橋將圯  
天雨時過其處竚立凝思重新此橋費苦無出有富  
商某後至問先生立雨中不行何也元熙告以故富  
商願助其半元熙拜謝雖途中濘泥弗顧其好善如  
此宣統三年冬清將遜國元熙絕粒十一日以殉年  
六十有五著有思古堂文存待梓

三續高郵州志卷四

忠列

十

人物志

孝行

同治九年閏十月邑舉人宋道源王建中邱逢源汪芬高蓉鏡張喬森吳杞林優貢生夏子猷談人格廩生陸雲龍王藜增生韋弼諧趙常禧附生湯鳳書張雲鵬緒鴻宋子良抄呈志書未旌孝行援武進寶應等縣成案彙請總旌入祀忠義孝悌祠並願自行分別捐建總坊以垂不朽十一年十二月禮部題請奉旨依議所有補旌前志孝行五十名孝女十名孝婦二十一名如左

三續高郵州志卷四

孝行

十一

明孝子徐鈇	華梓	馮守業	吳宗祐	張效先
胡倣	姚輔	孫諫	費庸	費虞
			高之榮	
清孝子張廷樞	楊三策	陳文憲	侯建山	陳
某	林紹榮	宋學龍	宋飛雄	宋長春
			張龍	
光	翟紹庭	孫枝秀	居成禮	孫同郊
			徐鴻	
王慎德	王謙光	欣漢瞻	夏致堂	李志雄
孔應試	車象	劉夢舉	徐應熊	葉令
			王	
士芳	邱雯	任基崇	邱祁	李夢韓
			李源達	
孫同爽	宋厚鑿	韋可舉	夏紀堂	周麟書
董寶鴻	郭福桂	黃某		

清孝女張師氏 刑楊氏 孫宋氏 陳周氏 張  
王氏 夏朱氏 張兆萱女 汪氏女 張曰相女

高聖榮女

明孝婦吳玳妻韋氏 沈蘭妻葉氏 楊毓和妻何  
氏

清孝婦郭建韜妻王氏 孫弓安妻潘氏 吳鈞妻

賈氏 孫昺孫妻姚氏 王湊妻沈氏 李廷試妻

賈氏 吳邦彥妻尹氏 李宗開妻王氏 王椿妻

房氏 李基鴻妻葛氏 張文有妻徐氏 李大有

妻楊氏 王文耀妻周氏 莊茂堂妻卞氏 王朝

三續高郵州志卷四

孝行

十二

選妻詹氏 金體齋妻林氏 李攀桂妻吳氏 吳

恩源妻周氏 以上據成案以下孝行俱新採者

清任基興字雲起號謹齋邑廩生吏部基振兄也事  
母孝兄弟怡怡深得母心平時侍奉無倦遇母疾尤  
加謹工於文造就生徒甚多著有同懷詩草謹齋文  
稿藏於家

周玉輪字逸齋郡增生少貧失怙恃事繼母孝母病  
輒憂曰母不起如兩幼弟何及歿慟絕復甦者數次  
館於家課次弟玉璋遊庠三弟玉坡納職積有貲產  
均分兩弟族中有無力婚娶者出貲助之後輪生子

五俱成就享大年

丁兆蘭道光時界首鎮人少孤貧販餅養母母邁非人不煖冬必爲母温足母歿盡賣什物營葬素未讀書一旦忽悟儒書釋典靡不了然乃授徒餬口並以所餘脩金濟貧童身未娶立姪爲嗣卒年六十六張方萱性至孝業屠喜飲醉輒好鬪母叱卽止命謝罪不敢違供母必有酒肉食畢陳說新聞以娛母意母卒泣皆血淚體素壯悲哀成疾旋歿同治十二年旌表

翟子仁行誼載再續志光緒二十八年旌表

### 三續高郵州志卷四

孝行

十三

卜樞字斗卿家世業醫居界首鎮幼時父病風痺手足俱廢樞侍奉不離母患乳岩潰爲母吮膿竟獲痊由是棄儒以世醫業遇貧者施醫施藥無少吝光緒中旌表卒年六十二

居鵬字雲莊廩貢生幼善事親父病痢手滌廁翳母疾大漸痰不得出口吸之鄉里咸稱其孝好讀書爲文精於說理性醇樸不染時趨館郡城極見重於歸安錢振倫儀徵晏端書晚歲家居憫里中水利失修請州牧錢錫賓詳修火姚閘改閘底深尺許鄉人至今賴之

吳晉甲字筠孫寄居泰州事親極孝母病晉甲手滌糞穢衣不解帶者數月母歿號泣三日嘔血而死年甫十七光緒十九年旌表建坊

周貴先字仲良家貧親老典衣鬻物以養母病三載餘與妻潘氏日夜更侍側及歿哀毀骨立未及小祥父病又劇侍奉尤謹旋病終哀痛異常里人爲立一鄉推孝匾額懸於里中義塾

張文秀湖西村農幼失怙母素患肝氣疾作時不能食秀亦不食母歿年踰八十秀哀慟如嬰兒未葬問安視膳如平日既葬廬墓三年寒暑弗離每晨必膝

### 三續高郵州志卷四

孝行

### 十四

行繞墓數匝宣佛號爲母求冥福哀毀骨立除喪未幾卒光緒三十三年旌表

楊昺原名錫袞字跛漁事母孝母病篤嘗爲母嘗糞少聰穎能詩工書法不得志於有司孫文正公延聘教讀十載欲保以官昺辭焉臨終將所積蓄盡散諸親族之貧者鄉里稱之

夏寅亮字慎徽父庠生應陞能文而性伉直咸豐中嘗與顧同恩稟請漕督分兵駐湖西以防髮匪郵境獲安晚年爲俗吏中傷陷於獄寅亮隨兄鼎四出奔走營救積勞成疾猶日往獄中寬慰其父由此形神

俱敝嘔血而歿後鼎遇學政夏同善於京江投江鳴冤夏爲之轉達蘇撫父獄乃解

徐通遠東鄉農民家貧事母極孝母歿權厝田畔遠廬墓二年哀毀成疾未幾葬母身故里人哀之

割股附

清吳贊字參乙事父漢醇極孝嘗因父病刲其左肱和湯以進其外舅孫鄉賢兆祥美以詩曰君家三世

前婦肉當姑糜

贊卽玳後玳妻韋氏割股療姑事見前志

刲肱者誰子世

德孝所推未幾父母相繼歿贊哀毀成疾嘔血數升後稍愈補諸生年至五十餘乃歿生平言行無一不

三續高郵州志卷四

孝行

十五

端敬兄愛弟撫孤姪如己出從子山公負雋才因母死毀至滅性而卒孫虞橋誅之以爲吳氏世以孝傳

云撮錄愛日堂文集

張聯桂字文臺上元縣訓導錫恩子幼有至性祖母疾篤刲股肉投藥中進之立愈時年十五弱冠工文入邑庠尋食餼同治甲子舉於鄉大挑二等以教職用改捐鹽大使分發廣東需次省垣與其子先後卒於旅邸妻宋氏扶兩櫬航海歸葬備嘗艱苦里人憐而敬之

趙瓚字筱農邑庠生少有至性年十四母金氏病危

瓚刲股和藥進病旋瘳後父患痢瓚取汚衣躬自浣滌逾月父卒瓚哀毀倍篤族黨咸稱其孝

龍汶字魯卿邑諸生有孝行嘗刲股療祖母疾事母至老愛慕不衰母享大年每語人曰吾幸有子貧何足憂哉鄉先生皆稱汶能養志云

胡進廷字茂先庠生邃於易學事親以孝聞昆弟六人咸敦友愛親病侍湯藥數十晝夜弗懈及歿哀毀骨立乞神祐夢親曾刺指血書玉樞經全部留五五惜字社室李氏亦能佐夫養志夫歿後刺指血書多心經二部爲其母及夫祈冥福云

### 三續高郵州志卷四

孝行

### 十六

詹廷藩字香山增貢生幼以孝聞道光末年甫十六母徐氏病篤藩求醫罔效刲左臂肉煎湯進母病果瘳又二十七年母歿藩壽至九十一歲乃卒

劉長發高郵人流寓甘泉大儀鄉之北父錦昌早逝母趙氏目失明長發亦有足疾不良於行無財產妻室惟乞食以養母母病危剜肉和藥進並刺血書告天願減已算代母母卒長發日夜跪哭墳前卒以身殉歿後葬於高郵湖西前十伍灣大路北里人立石以誌其塚光緒二十一年旌表入揚州總祠總坊

唐錦鳳字瑞岐幼嘗割臂療母病既壯從軍隸黃總

戎開榜麾下以功保舉至副將後坐法當斬將刑解其衣見臂上癩瘡黃詰得其故因釋之年五十四卒王者香字少波附生弟家祐字嗣波廩貢生性俱孝母葛氏病劇者香割股和藥以進遂愈母又患目幾失明家祐爲母舐目數月目愈家貧以館爲生兄館於郡弟館本邑迭爲迎養俱適母意鄉黨嘉之李觀海字筱源監生少有至性母病朝夕侍奉衣不解帶割股以和湯藥年四十四卒

周春沂字魯泉邑庠生六齡失怙母魏氏守節撫孤積勞成疾勢甚危殆時春沂年十六私割股煎湯以

### 三續高郵州志卷四

孝行

### 十七

進母疾漸瘥人不知也祖母窺其似有痛苦詰之始得其實入泮後善教生徒持躬廉潔鄉里稱之著有習靜齋詩稿待刊

居思一字明甫捐職從九少有至性父病劇醫藥罔效乃祈於神割股和藥以進父病獲瘳

陳錦雲字佩龍公田村農民幼性純孝母戚氏病四年不解錦雲割股療之母壽八十一乃卒錦雲子有裕字厚寬亦嘗割股以療母晏氏病現父子均歿里人猶稱爲雙孝焉

鄒寶連光緒乙酉年母病半載醫治無效勢已危殆

寶連情急割股和藥以進病乃獲瘳寶連年至七十  
五卒

左梓字楚卿年十八父病篤梓祝天願以身代乃割  
股煎湯以進病遂瘳

陳權之字秉衡父疾刲股母疾吮癰母喪廬墓生平  
樂善好施光緒末年卒

高樹嘉字幼芙庠生孝廉蓉鏡子也本生母孔氏患  
外症醫藥罔效嘉夜祈神刲肱煎湯奉之病遂瘳

萬重峯字雲程光緒中父齊卿病篤因刲股療之時  
年二十越三載母吳氏病危峯又刲股煎湯以進

### 三續高郵州志卷四

孝行

十八

王士騏字維之幼孤依母年十九母染重病延醫莫  
治刲股煎湯進之母病果愈

人物志

政事

明龔紱字子來號鳳泉嘉靖乙卯舉人乙丑進士隆慶初選授南充縣知縣三載改任清苑縣邑人稱其制行廉敷政公莅事勤撫民仁馭吏嚴五善俱備政成譽達內陞錦衣衛經歷未久以正直忤長官致仕歸杜門謝客州郡達官或訪之輒引避唯以歌詠自娛著有益丁樓集

採龔氏家乘

清張著字較明號象三公田村人順治戊子副貢選授福建浦城縣教諭嘗署縣事正直廉明歲旱禱雨

三續高郵州志卷四

政事

十九

獲應浦人作喜雨詩頌之大吏嘉其材奏改知縣補陝西兩當縣缺旋陞甘肅徽州知州以疾歸中途遇盜破其行篋唯書畫古硯歎爲真廉吏而去行至南鄭卒浦人思其德建樓肖象以祀之

採張氏家乘

謝鈺字山輝號樸庵順治丁酉舉人辛丑進士任河南靈寶縣知縣詳請豁免陝州靈寶盧氏三邑包荒銀糧二萬四千兩有奇在任五年以親老回籍卒年

八十五著有獨憩草

採謝氏家乘

王鼎臣字玉耳號石橋明御史珣裔孫生而岐嶷博學能文康熙戊午舉於鄉己未成進士選授河南祥

符縣知縣在任二年勸耕桑賑流亡輕火耗除雜派嚴保甲禁賭博通商賈革行戶興利除弊政無不舉其治獄嚴誣告懲訟師除罪應逮捕者概免籤提第令訟者持諭相邀一訊而決絕無牽累爲人好義輕財嘗捐金贖白張二姓被掠婦女有貧不能娶婦家將毀婚者爲具幣玉成之暇日爲府縣諸生聯文會親爲評定厚其獎勵由是文風蔚起撫院以下咸器重之稱其存心正直行政簡當和不隨寬而不縱治行爲中州第一將以卓異薦於朝會病卒闔邑士紳追思之公請崇祀開祥兩學名宦祠

採王氏家乘

### 三續高郵州志卷四

政事

二十

續相文字膽齋乾隆辛酉舉人父縉字雁峯由廩生充武英殿謄錄授廣東高要縣祿步司巡檢爲文疎宕有奇氣著綠雲紅雨山房詩詞興化鄭燮序之謂有三百篇遺意相文少承家學善書工詩性豪邁中順天鄉試歷任通渭藍山知縣才具揮霍有廉名罷官貧甚妻子寄居蕭寺中旋卒賈田祖以詩哭之曰豪俠無遺殖循良竟覆巢蓋傷之也

薛成榮字曉筠一字景桓號仲奇年十三入郡庠補廩膳生工小篆行楷善鐫刻詩文敏捷咸豐初入戎幕掌營務處審訊俘虜脅從者悉釋之多所全活亂

平以知府候補河南數折疑獄北方易旱著鑿井說  
暨井田歌上之大府不果行滎陽偃師有仿其法者  
輒獲利濬輝縣峪河築紅石堰督工百二十餘日不  
避風日工堅於鐵百數十村無水患光緒八年權理  
衛輝府事次年卒

卞庶凝字午橋世居三塚鎮幼負奇氣敢直言中咸  
豐已未經魁父尊五老病拘攣動必需人遇火災庶  
凝從烈燄中負父躍出若有神相在籍辦理隄工以  
勞績保舉知縣旋以軍功加同知銜選授雲南楚雄  
令時岑襄勤用兵大理幕僚軍將往來咸役民夫庶

### 三續高郵州志卷四

政事

二十一

凝按軍帖給之多求者不應士卒強取民物按法繩  
之並折服其將領由是見重襄勤調會澤令有小婦  
絞殺大婦者以自縊告親往驗之見繩痕周頸非從  
耳後上者嚴訊小婦盡得姦狀置諸法調昆明首縣  
近大府向苦供億庶凝至大府朝下一帖取油百斤  
應之暮復如是乃持二帖求見曰公署無白晝焚膏  
者何朝暮疊取爲自是徵求少戢時英人欲通商雲  
南岑襄勤不允政府詰之曰不允保無釁乎襄勤患  
無以應庶凝曰何不轉一語云允卽保無釁乎襄勤  
嘉其明敏乃決議不允適英人馬加理過滇入猓猓

野人界見殺英人斥言襄勤朝士有請殺之以謝者  
時李文忠當國庶凝與有舊因急往天津見之陳述  
情勢詞意誠懇李大感動乃與英使議寢其事庶凝  
歸滇遷景東同知調蒙化時漾濞或聚黨數千將爲  
變庶凝乘其萌孽消弭之旋以母老乞歸更號伍樵  
遂不出生平有知人鑒昆明陳大史榮昌少孤貧庶  
凝於途中一見識爲英材因召其昆弟至署親課之  
榮昌弟文筆尤美謂其發露太早恐不壽後果然庶  
凝年七十一終於家著有習靜軒詩文集

王恩海號星源彥和季子少從其舅沈吉田學於湖

### 三續高郵州志卷四

政事

二十一

州旣冠回籍佐黃總兵開榜戎幕光緒初納粟爲同  
知分省陝西值左文襄西征恩海奉差解軍火兼上  
游委辦賑糧歷有勞績補授孝義同知旋因迴避調  
甘肅丹噶爾廳甫三月連獲碾伯三巨案劇盜邊境  
肅然以功保升知府未任而歿

王金城字銘卿少時橐筆遊閩佐幕臺灣因援例仕  
閩省任臺灣縣典史由軍功保縣丞值寶應王文勤  
公撫閩採用金城所上條陳檄往八通關開山撫番  
保升府倅同治中任福州府經歷聞捻首張總愚犯  
天津官軍餉匱特上書閩督左公請購軍米航海解

赴津營左公躋之卽以其事委金城事竣敘功保知縣初署邵武縣事創育嬰堂令生母自乳溺女惡俗以除置義倉足民食邑有焦坑煤鑛居民私採爭訟不已金城勘斷給民工貲煤由官售以餘價辦團練請弛封禁荒山任民種桑棉以興地利又設法清釐糧賦結前任移交案百餘民咸便之旋調福清邑民健訟每告期呈詞數百金城隨收隨審無留獄旬月清積案千餘興書院厚給寒生膏火刀筆漸稀海壇副將某誣沿海貧民爲盜將詳省駢誅以邀功金城明其無罪開釋百餘人副將因誣以縱盜上憲嚴詰

### 三續高郵州志卷四

政事

二十二

力剖得白署同安縣擒巨憝莊俊又火其廬獲鎗械私刑無算有朱子八卦溝淤塞已久出俸錢開通之自是邑無水患旋調詔安縣勦九里林盜巢除民巨害建考棚修祀典各祠廟亦皆捐廉舉辦再任邵武縣事兼攝邵武同知以事忤制府意劾之落職回籍後修族譜創宗祠族有婚喪無力者悉厚資之邑中公車賓興及恤嫠善舉皆出鉅款以佐焉安徽天長縣向無育嬰堂捐資爲設接嬰所甲辰秋逢孝欽后萬壽邀恩開復原銜卒年七十三

張樹建字玉甫幼失恃善事兩繼母同治初父杏林

戰歿於陳州樹建徒跣賊壘皆斃間求之七日獲遺骸歸葬喬勤恪公撫皖樹建以監生候補府經歷隨營差遣積功保知縣初署和州州同迎祖母之任歿於舟中貧無以殮知州游智開賻以三十千樹建書券拜受後卒歸之光緒初署靈璧縣事每匹馬行田間問民疾苦盡得諸奸猾狀擒其渠治之無賴皆斂跡遇疑獄片言決之如目睹邑有逸盜預告追捕者以盜所在如其言往無不獲咸驚爲神繼署亳州毫人拒外人傳教樹建因勢利導羣情渙釋毫俗官價買物當時值三之一悉蠲除之以恤商民已補渦陽

### 三續高郵州志卷四

政事

### 二十四

縣值劉疙疸亂事初定道殣相望乃請免丁糧以紓民力兼以工代賑開青洋溝導淝入渦疏河三十里溝七十里民樂其利庚子北方亂亟潰軍回籍或持械劫奪樹建出令繳械者免否則罪之游勇乃戢治靈璧亳州渦陽最久中間署宿松修同仁隄署盱眙清灘田皆百世利賴之事尋以大計卓異洵升知府留皖省奉檄往皖北權土稅復查辦冬防所至鄉父老遮道問起居如家人旋署潁州府事值淫雨爲災籌辦賑撫積勞成疾卒於官弟樹功字保衡以監生歷遊左文襄英果敏諸公墓府累功保舉知縣歷署

陝省安康定邊知縣庚子歲陝境大飢樹功籌義賑  
練團防邊民賴之旋補藍田縣未履任歿於長安著  
有投筆錄及地理釋疑待梓

邱逢源字右淇幼貧力學同治甲子舉於鄉丙寅冬  
捻首賴汶光過境以守城敘功保舉知縣爲邑總董  
十餘年歷任州牧皆倚重之邑中義倉久廢偕邑人  
獻議於忙漕項下帶徵十年倉儲得以籌備光緒十  
年選授河南陽武縣決獄不輕用刑而庶事咸理越  
二年鄭工決口輸送稽料爲各縣先工竣保舉直隸  
州以目失明致仕歸卒

### 三續高郵志卷四

政事

二十五

王炳智字明甫號蓮湖少有豪氣不拘繩尺值洪楊  
之亂棄書從戎隸黃總兵開榜麾下咸豐末與剿盱  
營叛匪嘗手拆石橋匪不得渡轉剿宿州連夜露宿  
馬上馳數百里以功保舉州同初選廣西之龍英坐  
領憑逾限鐫秩旋捐復原官補安徽無爲州州同職  
司江防督民夫修築隄堰舊時夫役納錢勢豪轉獻  
官府官卽收工散夫成爲積習一遇江水盛漲輒潰  
災遍七邑炳智到官革除陋規畚鍤一興不離工次  
閱工日數十里逾限者嚴斥之誤工者重扶之工乃  
堅實常以三壩地勢高險非加築青山圩不能鞏固

乃調民夫三千築成堅圩三壩始晏然無恐又預積土牛數千爲盛漲搶修之用遍植楊柳護隄禦浪在任數年江防訖未失事某年因積潦成災上憲委查災區時村堡多在水中炳智乘木桶拍浮以往吏不能從乃左手持竿右手執簿逐戶書名悉無遺漏上憲嘉之年未五十辭職歸爲兄蓮莊償夙債數千金後皖撫陳公寓書招之將任以繁劇謝不往尋以老病終於家

王壽寓字泰符同治末以諸生投効大理府軍營辦蒙化糧台有功滇撫岑襄勤公保奏以縣丞用雲南

### 三續高郵州志卷四

政事

二十六

肅清襄辦轉運京銅局善後局歷委竹園白鹽井釐捐俱以廉著光緒中補授副官村縣丞副官爲永善分縣轄地四百里紳權素重壽寓外和內剛不激不隨紳民畏而愛之任滿保留前後凡七年大計卓異陞授威信分州改補鹽提舉皆不就致仕歸

人物志

文苑

清王貞憲字汝勅一字勅如父燦

補從王族譜

孝謹敦禮

教為里高士貞憲幼而敦敏通毛詩大義初補諸生

鄉賢孫泰階先生見其言動蘊藉有典型命子虞橋

兄事之嘗與虞橋輩結震社凡十四子推貞憲為長

切磋文藝並以道義相糾繩鄉黨由是知貞憲足稱

人師爭延禮之充順治丁亥歲貢廷試高等補石埭

訓導上游咸矜式之陞桐城教諭邑多鉅公亦相推

重會知縣缺署縣事兩月民愛戴之曰人師也抑眾

三續高郵州志卷四

文苑

二十七

母廉吏也如處女旋以內艱歸遂不出卒年八十一

陳鏞字武公號義聲幼穎異年十八補諸生鄉賢孫

兆祥妻以女期以遠大鏞益奮志下帷閉戶乾明寺

十餘年鄉里重其品學明末癸未詔天下保舉賢良

州牧張以鏞名應詔郡亦報可會以國變不果充清

順治庚子歲貢子灝瀏俱庠生

二條撮錄愛日堂文集

李乃綱字次吉號蓑雪明嘉興知府化民子少耽文

史落拓不羈工詩善書畫常游揚州畢刺史載績觴

客依園名流畢集陳菊裳

通州人

作圖陳其年作記綱

與杜于皇十餘人各綴以詩焉僑寓寶應以書畫得

贊日遊醉鄉消遣窮愁沒於蕭寺喬侍讀萊綱故交也謂爲士之窮而不遇者約諸弟姪爲之治終

金鍊字澄江號雪峯康熙時名諸生工詩及行楷書中年寄情山水著浣俗齋吟稿爲舣篋者誤攫去詩遂不傳同時有金炳者字帝宣號虎山七歲能文困於小試年三十乃改就武中康熙丁卯武舉甲戌成進士官崇明守備亦工吟咏

採耆舊詩存附傳

孫戴字履和號禮堂父紹聞見前志戴少穎異操筆爲文動與古會甫成童同邑夏廷芝茅俊羅克念咸以爲畏友未冠補諸生興化李光國寶應王懋竝論

### 三續高郵州志卷四

文苑

二十八

其詩清剛灑轉文縱橫排奐俱能抗迹古人雍正癸卯舉於鄉再上春官不第卒年三十二

採孫氏家乘

陳兆蘭字香谷號畹園乾隆戊午舉人父京載前志篤行傳兆蘭性謙謹屢上春官不第遂肆力於詩歌與弟桂及同邑宋鴻儒沈均李貢賈田祖沈錡結社聯吟時號髀湖七子咸就正於李基簡兆蘭爲基簡同年生竟退處弟子之列其服膺風雅如此基簡歿提倡詩社仍十餘年著有相禳集弟桂字騰芳號沛舟乾隆己酉拔貢博綜羣書邃於經學性真率不事雕飾詩格亦坦夷愷直興化李定齋以爲中聲之所

止著有問樵集

宋鴻儒字惺中號椒園邑諸生爲李基簡外弟貌清癯而意澹遠興化李定齋稱爲逸情秀骨天生詩品晚歲村居境益困歿後賈田祖弔之有破屋着荒棺之句蓋詩人之最窮者著有東村集

李貢字格非號荆門基簡子也郡增生自其曾祖震及貢有四世詩人之目貧無立錐而崖岸壁立常傭書以供母夏侍講廷芝督學山西羅致幕下他皆不屑往也李定齋稱其詩抒寫性情令人無端歌哭著有默存齋集

三續高郵州志卷四

文苑

二十九

沈錡字于湘號鐵崖海陽令雅子乾隆己丑歲貢四歲失母其父宦遊後母復歿錡撫異母弟鐸鈺甚厚爲文才雄質厚凡古今人物臧否事幾得失咸洞見隱奧發爲詩歌縱橫排奐有不可控勒之勢著有無能子集子宗溥宗沆皆庠生溥能文而性僻異不事生產囚首垢面談詩書見俗人至則白眼待之自號執犛子夏紀堂嘗爲之作傳沆勤學工書法

以上均採璧湖

聯吟集序

張慶仰字嶧靈乾隆甲辰歲貢工文歲科試屢列前茅爲人恬淡而端謹視小不潔若塗炭而待物和厚

交之者若飲醇醪尤喜引掖後進遇佳子弟無不悉心教授有膏火不給者解囊助之生平嗜學雖盛暑帳中置短檠瀏覽不輟晚年手錄經史子集及漢唐文盈篋一筆一畫無所苟或遇舊交則煮茗論文徹夜不倦年七十三卒

採張氏家乘

葉皓字鵠原邑廩生勵行讀書精於文律與弟煥互相師友歲科試屢冠軍乾隆乙酉薦元未售門弟子極眾稱爲葉九先生煥字錦亭乾隆辛卯舉人亦雄於文著有此君書屋稿

毛翮字騰岡乾隆壬辰歲貢長於經古力學耽吟與

### 三續高郵州志卷四

文苑

三十

劉豫堂龍寅谷邱木邨相唱和詩稿不傳

王正倫字品常號橋門乾隆乙巳歲貢端方有守爲文高華典貴夏侍講廷芝恆稱許之一時邑中爭延課子弟桃李稱盛棘闈屢薦不售以明經終

程謙字會一乾隆戊戌歲貢爲文精研經義不屑空衍弟晉字錫堂受業於兄弱冠遊庠至七旬乃食餼爲人端方正直力學不倦兄弟並誠於教授雖氣質魯下者皆得引而進之成就生徒甚眾

以上均採感舊集附傳

楊棻字德芳號柳橋廩生居臨澤鎮早失怙力學有文譽乾隆末以冠童子軍入學歲科試屢壓其曹古

學嘗冠一郡卒年三十九士林惜之著有柳橋詩鈔  
菘韭山房吟藁子國華字石君邑增生事母孝教授  
鄉里遊其門者多有成

陳理祥字吉人諸生工書法能於寸幅中寫天地全

圖著有南園文稿

續揚州府志

萬春字雨臯邑增生研究訓詁之學詩文亦古雅書  
工八分著芋香館吟草有詩採入耆舊詩存同時吳  
東淮字桐原名諸生端方自守詩文古茂年八十猶  
博覽經史書法亦奕奕有神

張堃字蔚中郡廩生少失怙恃與堂兄經相友愛如

### 三續高郵州志卷四

文苑

三十一

同懷老而愈篤專攻時古藝兼長詩賦有聲庠序間  
晚通道家之學著作不傳存醒齋詩草一卷

薛國慶字雲侯諸生幼時爲文極敏省試久不售橐  
筆遠遊幾徧天下年老歸里樂善舉遇節孝事輒助  
貲出力著有紅杏軒游草趁閒錄榴軒詩文集子成

榮自有傳

續揚州府志

徐玉才字穀田號菊癡郡庠生工詩賦並精醫學以  
廉靜聞於鄉黨長子榮槐字植三仁厚有父風由諸  
生應光緒癸巳恩科欽賜副榜卒年九十三次子方  
桐孫迺敷皆庠生

王保先字護曾號湘帆咸豐壬子恩貢工舉業爲人外和內介不肯苟同教官某惡不從所欲將文致其罪褫廩餼焉會歲試案發則優等第一也卽褫仍補原缺乃止少時試揚州梅花書院與儀徵晏端書稱一時瑜亮迨晏致仕歸揚已四十年爲梅花書院掌教見課卷前茅仍有保先名乃邀見置酒以待極爲歎惋居鄉教授生徒多所成就卒年七十餘

姜巨卿字偉人世居三塚鎮少從其族叔肯堂遊爲文心精力果效法章羅年十九入學攻苦益甚雖膺咯血疾不少輟也試列優等食餼生平事繼母極孝

### 三續高郵州志卷四

文苑

三十一

待族里極厚屏去俗好日手一編年三十四病瘵卒鄉黨惜之

高蓉鏡字芙初號小南庶常鴻飛長子績學工文早年食餼父宦南方十餘年率諸弟布衣疏食閉戶讀書父殉難於臺灣實由副將某擁兵不救蓉鏡聞變率諸弟訟諸大吏大吏緩其獄遣幕友示意謂副將願出四萬金爲卹費俾勿深追蓉鏡泣曰吾父爲吏十年受國專城之寄豈輕身探賊巢者今副將公文具在約辰會而午不至吾父之死非渠尸之而誰余兄弟卽貧且不肖萬不敢賣父以求富大吏知不可

奪乃奏其狀於朝置副將於法蓉鏡以難蔭襲雲騎尉世職中同治庚午經魁光緒庚辰例逢大挑因年逾六十免挑賞加國子監學正銜生平襟懷沖澹父門生故吏多通顯者來訪但以禮接之未嘗有所干痛父歿於王事不求仕進唯務成就後學有請業者反覆講論聲如洪鐘終日亶亶不倦嘗遇饑歲絕糧食倭瓜凡七日與生徒講藝仍不輟也以是弟子多掇巍科晚歲負鄉望州牧延主珠湖書院講席凡十九年於評隲文藝外官以大事相訪則正告之否則足跡不至其門兼明醫術不常爲人治戚友間有臨

### 三續高郵州志卷四

文苑

三十二

危者偶投一方必有奇效卒年七十五著有藕塘吟草待梓弟人鏡監生福建試用同知清鏡附貢生候選訓導其初並有官資父歿後與兄同志皆以舌耕終其身

夏庶諧字月樵少嗜學工文儕輩折服弱冠遊庠中年赴試江陰罹冤獄禍幾不測邑父老公請昭雪因得原名應試復補諸生旋食餼充光緒己丑恩貢教授生徒成就甚眾晚歲校閱同善會課刪改批評不遺餘力尤精醫學得外家翟氏真傳然不輕爲人治年七十一卒輯有滄海一粟編待梓弟庶熙字績人

受業於兄性恂謹亦能文光緒丁亥歲貢諧子龍文  
駿聲鳳翔均庠生

王藜字秉青同治辛未歲貢幼魯鈍而勤學年至十  
六七心地忽覺開朗自取名家文夜讀數月而英氣  
勃然年十九遂遊庠旋食餼同治中疊遭歲荒賴筆  
耕以自給成就後學甚眾生平長於料事剖晰利害  
後無不驗交友以誠不苟然諾人有爭競一二言排  
解各如其意以去邑中恤嫠育嬰同善會及勸捐增  
廣學額諸善舉皆極力贊襄不辭勞瘁卒年七十有

一

三續高郵州志卷四

文苑

三十四

王壽培字養源績學工文性渾厚同治甲子舉人光  
緒癸未進士截取知縣需次廣東張文襄公督粵重  
其文學屢託評校廣雅書院課藝留省垣凡十餘年  
始補授石城縣下車甫五月病卒任所年七十  
王東寅字平子號柳亭光緒辛巳歲貢舉人留福子  
少承家學工詩詞性耿介澹於進取以廉靜聞於鄉  
嘗公推監造崇聖祠歛無虛糜教授生徒極嚴遊其  
門者俱有文行年六十七卒遺有柳亭詞集待梓  
吳慶鴻字秋青同治戊辰歲貢少負文譽事母尤孝  
左刺史輝春器之州試拔冠一軍入學後歲科試屢

列高等而棘闈薦終不售後學從遊者甚眾刺史唐  
澹亦遣子就學慶鴻語介紹人曰公子來學當與羣  
弟子一體服勞不得攜帶僕從且寄語我公每年與  
鄙人通謁一次可耳不勞屢顧蓬葦也刺史敬諾之  
其耿介如此光緒初刺史金元烺再續州志諸稿半  
出其手年六十八卒無子著有春秋指歸子史名言  
紀年錄淮南水利臆說爪印軒文鈔賦鈔稿俱散佚  
僅餘爪印軒詩存一卷其門人唐如尙梓而行之  
陸綺文字麗卿增生弟雲龍字子荀廩貢生俱力學  
能文雲龍尤好讀書手鈔盈尺輯有諸子彙函四卷

### 三續高郵州志卷四

文苑

三十五

綱鑑摘錄八卷待梓歲科試兄弟屢列優等時有機  
雲二陸之稱教授生徒皆多成就

夏承禧字鴻卿增監生候選主簿入學後幕遊燕齊  
所至見重常主講固安縣方城書院三年成就諸生  
甚眾呂太史鳳岐督學山西聘往襄閱試卷亦稱得  
土著有復遂園詞鈔小學補遺二卷藏於家

李觀光字賓甫光緒丙辰歲貢父福謙精易學未及  
遊庠而卒觀光少孤因自勵學博覽經史入泮後歲  
科試屢列優等教授鄉里門弟子青其衿者數十人  
夏子猷字訪雪幼純謹力學善書法入學後歲科試

屢冠曹偶同治甲子以優貢考取知縣分發山東代理蒲臺縣旋署蒙陰蒙邑食鹽自萊運入向歸民辦往往起釁猷蒞任極力整頓申請歸官辦積弊乃除在官公餘之暇編輯先世詩文等稿四五種祇刻半舫齋詩鈔餘未及梓行而卒

周槐卿字植庭同治壬申歲貢世居界首鎮天性純篤少從吳榮芝遊質魯而力學一旦開悟文譽大噪食餼後設帳本鎮成就頗眾性孝友母王氏病劇時嘗割股以進兄上卿無子槐卿奉孀嫂甚恭命子聯科承嗣兄有遺貲悉作姪女奩贈時人以爲廉卒年

### 三續高郵州志卷四

文苑

### 三十六

五十五聯科字養盈增廣生少承家學亦負鄉望舉己酉制科孝廉方正

緒鴻字湘南邑增生年十六以默經入學工書法出入歐顏二家求書者甚眾頻年遊幕遠省著有公餘雜詠稿多散佚年五十九卒於涼州鎮署

談人格字孚遠號笠生崑山教諭文煥季子也年五歲母高氏口授以唐詩三百首悉成誦且能講解其舅高庶常鴻飛試之果無舛誤因贊曰是兒他日必以詩名人格稍長果日事題咏初仿白香山體落筆卽成邑耆宿張菜畦箴之曰子詩才甚敏而格未高

蓋取法於上乎人格乃悉搜漢魏三唐以及宋元明清諸名家集而揣摩之詩學大進秣陵楊長年謂其五七古汪洋恣肆出入蘇杜五七律全是唐音詞則野雲孤飛純摹白石洵定評也所爲制藝亦力追先正初以兩冠童軍入泮旋食餼歲科九列優等每試古學必前茅同治庚午考取江南第一名優貢朝考二等以教諭用歷署贛榆縣教諭淮安府教授中光緒戊子舉人補授碭山縣訓導晚歲因病告歸邑有司延主珠湖書院講席兼充致用學堂總教習年七十卒於家著有困悔齋詩詞集讀書臆測待梓人格

### 三續高郵州志卷四

文苑

三十七

才高學邃詩尤所專長邑中諸耆宿嘗謂能繼李北岳之後其生平論詩於當世罕所許可唯館於沐陽時常與王孝廉詡相唱和談以豪爽勝王以烹鍊勝互相推服焉

林鶴齡字放亭光緒己卯舉人父增貢生法臯有文譽鶴齡尤工制藝內行敦篤遊庠後閉戶讀書淹通經史惟困於場屋年逾四十始獲食餼旋登賢書居鄉屏絕俗事創立桂香芹香兩社社會文專以裁成後進爲務卒年五十三

董泰培字階平附貢生歲貢翰池子少習舉業文理

精深爲前輩張菜畦朱梅葺所器兼長散體文涉獵諸家落筆動與古會教弟子以博學爲先力矯空疏之弊天性渾厚與人無爭鄉里稱爲長者晚喜畫山水題識滿幅藉以自娛卒年七十八著有枕湖樓詩文集弟坤培字廣平廩貢生工制藝律賦以典麗見長秋闈屢薦不售性好吟詠手錄唐宋諸家詩集成冊兼蓄古書法帖鱗次案頭與兄泰培昕夕論文白首無間

沈慶平字小樓邑庠生性耿介善書法規樞褚河南晚歲所書屏聯風致秀逸不減少時求書者甚眾慶

### 三續高郵州志卷四

文苑

三十八

平靡不應之民國三年年七十八已及重遊泮水之期因科舉久停不便舉行縣知事姚崇義特給新邦人瑞額以旌之

吳嵩泰字岱雲一字少秋漢陰通判贊清子邑廩貢生能文工書精篆刻少從興化劉熙載遊劉器之妻以女入學後有聲庠序喜爲詩多抒寫性情之作中年遊浙復泮漢入秦行跡所經篇什益富生平澹於進取至性過人自幼嗣伯父後伯母年高居家侍養本生父歿任所不獲躬親喪殮因此抱憾終天晚年閉門謝客並詩不復多作以子同甲貴誥封通奉大

夫年六十七卒著有課餘吟稿遊秦小稿待梓  
王寅字賓谷少孤貧嗜學工詩詞書法並善畫梅彈  
琴童年值洪楊之亂考試久停舉業不甚措意亂定  
後友人應試海陵強寅與俱學使賞其楷似鍾太傅  
因入泮然寅卒無意進取但蒔花種竹教授鄉里以  
終其身家無儋石晏如也夏編修子錫與寅爲契友  
嘗贈以句曰興來竹葉常爲友清到梅花似此翁著  
有北漁唱詞集梓行年八十七卒

張澍霖字秋岩郡廩貢生光緒乙酉科舉人少時家  
貧力學不輟工詩賦文詞有聲庠序書法尤妙得顏

### 三續高郵州志卷四

文苑

三十九

魯公之神並工篆刻幕遊於外足跡歷東南數省書  
記翩翩爲一時所重著有悔餘庵遺稿

楊福申字引卿號雨谿給諫福臻弟也性孝友兄勤  
舉業委以家事福申乃納監不出應試專理家政兄  
官京師俸不足用福申隨時供給毋使缺乏筦出入  
數十年毫無所私待子姪如一體生平績學耽吟詩  
律老而益細詩餘曲折瀏亮不染俗氛書法得王趙  
神韻年五十餘卒著有容安小室詩詞梓行

卞庶諧字允卿號湘漁廩貢生少從兄堅學善屬文  
入學後旋食餼生有至性幼時諸兄析居於外父病

手足偏廢諧朝夕扶掖服勞不懈父病革嘗效庾黔婁嘗糞云及母年高諧在側侍奉悉愜母意爲文境地極高中歲不遇卽淡於進取專務成就後學耽吟詠著有敝帚集蓼花軒筆談待刊年七十六卒長子汝方字亦房工制藝光緒甲午舉人次子汝舟庠生卞汝霖字雨亭光緒庚辰歲貢早歲補諸生文名卽噪同治甲子會考學使擬取優貢汝霖名在第四漕督吳勤惠公以其未食餼抑之丙寅歲試第一乃補廩膳鄉試屢薦不售居鄉教授從遊者極多秉性直諒事繼母以孝聞兩弟早歿撫教孤姪悉成庠彥晚

### 三續高郵州志卷四

文苑

四十

歲負鄉望鄉人偶有爭執得汝霖一言排解卽釋其信義服人如此年六十餘卒

徐恩培字敦甫廩生夙承家學通經史於詩賦尤擅勝場並 醫術英年早歿鄉黨惜之

朱敏中字伯時戶部主事柘子邑庠生博聞強識兼工書法嘗手錄通鑑全部凡以經史質者必詳告之如數家珍爲人端嚴嘖笑不苟鄉人望而生敬著有穉梅文稿藏於家

王虎卿字召穆歲貢藜子少承家學制藝詩賦獨出冠時食餼後十列優等光緒乙酉拔貢朝考欽用知

縣宦遊蜀省見重於廉訪游公屢委查辦重獄頗得情實後署江安縣立義學實倉廩修城垣建礮臺砌火藥庫創團練得精銳數百人以防奸宄次年鄰縣土匪竊發卽借其團兵定之而江邑晏然旋以與地方權要齟齬鐫官去旣歸課耕教子杜門謝客有所感輒託諸文詞以見志年七十一卒著有逸園雜著待梓

吳雲章字倬人舉人杞林長子增貢生年十二卽應童試背經如流十八遊庠適遭洪楊之亂乃投筆從戎隨總鎮陳國瑞至山東剿匪多所贊助陳欲列其

### 三續高郵州志卷四

文苑

四十一

名於保案雲章辭焉事平後仍歸習舉業屢薦不售授徒本邑及天盱兩縣從遊極眾兼通醫術尤精眼科得其治而復明者甚多卒年五十九著有眼科秘要待刊弟雲程字達人光緒乙巳歲貢幼習商業弱冠後勵志勤學制藝詩賦俱擅勝場年二十七補諸生歲科試屢列優等乃食餼生平廉隅自勵教人以敦品爲先成就後學甚眾卒年六十

吳慶保字赤蠹光緒庚寅恩貢生博涉經史工制藝歲科試屢列優等棘闈屢薦不售晚年以詩酒自娛著有蟄居吟草年七十三卒子家麇亦聰穎好學工

詞賦邑廩貢生

周槿榮字又房邑庠生篤學工詩館廣陵潤州多年與名人唱和詩詞興極豪邁遊其門者多成就尤熱心善舉有與義塚接壤之田三畝嘗出貲購爲塚地著有覆瓿草鶴村草堂詩鈔

居淦字筱泉邑庠生賦性耿介筆耕自給生平嗜酒工詩尤精書法且明醫術鄉里有請診者卽與療治屢困棘闈義命自守年七十二卒著有半耕埜人詩集藏於家其族叔灃道光中諸生字筱江性雅潔亦工書法

三續高郵州志卷四

文苑

四十一

楊莘字亦孫給諫福臻長子幼岐嶷工制藝及詩詞未冠遊庠旋食餼身弱善病年二十八卒著有悲秋閣文集紅豆齋詩餘待梓

孫萬章字選青廩貢生工制藝詞章有聲於時善畫墨蘭著有瘦紅吟館詩詞稿待梓從子樹棠字筱伯廩生亦工制藝詩賦歲科試屢列前茅並長於倚聲年未五十卒

張曾勤字善孜髫年與弟曾勉同入泮有機雲之譽科試以賦史忠正公祠懷古詩見賞於學使補上舍生益肆力於學館穀所入半以買書故於時藝外兼

長各體詩文教誨諸弟悉入庠序兼倡文會誘掖後學尤篤友誼邑王某富典籍謀刻鶴壽堂叢書延曾勤纂輯事方經始而王歿曾勤爲終其事內有前哲著作姓名隱歿者特辯明補正之踰年刻成巨編自著有選青書屋詩文集待梓弟曾勉字仰徐廩貢生能詩亦雄於文鄉先輩咸刮目相視稱爲能手鄉闈屢薦未售歿年甫三十三歲士林惜之

王希堯字仲賢少失恃事繼母以孝聞年十六與兄誦堯同遊庠旣而父兄均歿祖年八旬異母弟尙幼希堯爲家督人無間言生平好讀書時作古文奉桐

### 三續高郵州志卷四

文苑

### 四十二

城爲圭臬嘗署鹽城桃源教諭教士有法年五十卒於家

胡友梅字瘦生廩貢生好讀書能詩性亦樸直不遇於時以課徒自給著有讀書新述十二卷古月軒吟草四卷年未六十卒

王樹藩字少愚邑廩生幼時好爲倚聲初成小令邑中老於祠者卽歎賞之益肆力於長調具體宋人書法行楷俱工爲人詼諧灑落貧無立錐晏如也年四十二卒無子妻阮氏殉焉遺有竹簾詞一卷寶應朱謹貽梓而行之

賈繼宗字繩孫自幼嗣伯父元章後本生父承誥昕夕課之年十二卽能默誦諸經操觚作文蹊徑特別十六遊邑庠益縱覽子史留心經世之學光緒庚子未開科舉乃援例爲府經歷分發江西肄業於南昌校吏館所擬一切新法章程凡萬餘言考試屢冠其曹撫軍方伯皆以爲可大用會壬寅復行科舉繼宗回籍應鄉試中式遂棄官不就再赴禮闈薦而未售旋停科舉繼宗乃壹志創辦學堂時邑中官立學堂凡二辦理皆未盡善繼宗參觀江南諸校偕邑中同志另籌經費立贊化學堂會淮安周衡甫太史創辦

### 三續高郵州志卷四

文苑

### 四十四

中學延繼宗任經史地理三科從學生徒數百人靡不欽服每旦授課夜則獨出新意編輯講義不三日必馳函本邑贊化學堂與諸同志研究教授管理諸法由是積勞成疾每日咯血數升猶力疾上堂講授病遂不起卒年甫三十淮揚兩郡諸同志開會追悼之生平於經史外尤喜讀諸子著有注釋諸子類攬四卷子卷叢鈔四卷及詩文集待刊

人物志

武略

明王仲一居高郵之打魚村羣雄逐元仲一兄弟起義兵會焉從太祖渡江仲一以功授山東左衛正千戶仲二仲三各以功累襲長沙衡州二衛指揮仲一子成襲父職從成祖南下功最陞衡州衛指揮僉事同知子孫世襲遂爲衡陽人

採王夫之家世節錄

王觀字清甫宋揚州別駕鞏之後從成祖靖難累功陞福建都指揮使拜龍虎上將軍上護國驍騎校尉其没也上御製文遣內監及行人蕭榮祭其墓曰朕

三續高郵州志卷四

武略

四十五

平區宇內難外艱多賴劬勩克底寧績方用爾嘉增爾爵賞聞卿物故朕甚悼之特遣重臣造墳安葬禮用五壇以光泉壤欽哉其墓在車邏鎮西欽賜祭田四千畝卹典甚厚子孫世襲北京金吾左衛都指揮

使

採王氏家乘

清孫開圖字疇九號洪軒幼卽岐嶷甫成童父以偶獲金爐株連陷獄開圖攜老僕赴省白冤於臬司庭質時侃侃直陳無所畏避臬司奇之乃免其父且語人曰此兒氣宇超羣非常人也開圖年十八嫻習弓馬因遊邑庠尋鄉會聯捷成武進士順治己丑欽點

傳臚初任信陽守備續陞東昌都司治軍嚴肅值歲大荒開圖首倡輸捐煮粥給賑同寅暨紳富翕然應之得米數千斛全活無算後署大同游擊軍民安焉旋告終養歸里里人有過東昌者聞其民猶思之不

置云

採孫氏家乘

夏奉朝字梧階臨澤鎮北鄉人幼隨父流寓揚州爲粵匪擄入江西咸豐七年官軍克復臨安奉朝乃投楚軍由贛入浙隸左文襄公麾下十一年從剿僞侍王李世賢以功授藍翎把總同治元年克復遂安授守備二年克復金華府屬諸縣均有功升授花翎都

### 三續高郵州志卷四

武略

### 四十六

司旣而奉檄援皖克復黟縣又剿江西景德鎮及鄱陽彭澤等縣賊立功授參將加副將銜四年克復廣東鎮平縣攻克嘉應塔子壘殲除逆首並復州城以功授副將五年剿福建土匪有功以副將儘先補用時髮逆已平文襄移督陝甘調奉朝統領恪靖馬隊前營六年偕總兵楊和貴周金品屯鳳翔防禦回匪加總兵銜七年隨文襄討捻立功授總兵又疊破回巢賞矯勇巴圖魯勇號奉朝勇敢誠實與士卒同甘苦謀定後戰所向有功故文襄恆倚畀之旣而關內肅清奉朝請假回里時與鄉之宿儒相往還並涉獵

書史臨池作書頗得魯公筆法光緒十四年奉詔入  
覲奏對稱旨因發往甘肅補用晉提督銜十六年秋  
以舊傷發卒於蘭州年六十二奉旨照例議給卹銀  
廕一子六品入監讀書子三人長致恆以廕授安徽  
通判

三續高郵州志卷四

武略

四十七

人物志

獨行

明翟元燿天啟壬戌恩貢選授西充縣知縣尋陞龍州知州崇禎末解組歸會國變隱居湖西不復出偕夏之璜毛一駿結吟社以銷餘年與王少保永吉有舊少保事兩朝元燿於詩中時寓諷刺其自寫曰諧俗愧為長樂老論詩恥作夜郎王可想見其為人矣詩出入蘇杜兼仿山谷非俗手所能嘗兩舉鄉飲大賓長子善由順治庚子恩貢選授膚施縣知縣未久即告歸次子美庠生早歿

三續高郵州志卷四

獨行

四十八

按翟氏父子前志歲薦中列名他無事蹟可考近從藏書家獲鈔本一帙底面亦已殘缺中有七律二百餘首惟集無名亦未著作者姓字細就各詩語意推測證以志書知確為元燿所作集中有子善欽拔詩曰昔父明經三十四兒今三十四明經查順治末歲薦名善者祇有翟善又有六一紀年詩曰戊子生人戊子逢是作者生於萬曆戊子數至天啟壬戌恰得三十四年而貢者為翟元燿下注龍州知州乃知元燿即善之父又詩每首後自注曰坦云則坦必係作者字或別號然不可深考矣

撮詩中事蹟以存其人

張廷瑞字侍臣歲貢元紘玄孫邑庠生入京為禮部儒士甲申之變退而家居明年王少保永吉將出山

問卜於界首東嶽觀之四聖樓得今日白衣明日相  
之兆召廷瑞議進退廷瑞辭弗見因以布衣終其身  
子士覲字英如見續志義行傳

採界首張氏家乘

清戴天高字瞻明父應魁載前志篤行傳天高生而  
敏重幼穉無戲容讀書嚮慕聖賢言動必中規矩既  
補諸生人望之輒生畏敬就而親之從未有疾聲厲  
色加人嘗授徒勲勲懇懇偶以喪葬經營輟課晷刻  
輒自責曰吾豈得負人誤人遂辭館躬行陵陌求善  
地以葬其親結廬塚側省視如事生素講正心誠意  
之學力行不怠事事求合乎古人晚年忽慕佛教遊

### 三續高郵州志卷四

獨行

### 四十九

華山天目徧訪名僧因持齋茹素頗通禪慧歲丙辰  
自知死期及日無疾而逝子璧臨載前志文苑傳

採

孫虞橋愛日堂文集

張杏字蔭賢廩貢生明經之泗子幼聰穎目數行下  
博學多聞時稱書笥詩文駢散俱工爲人外和內介  
不屑與世俗爭衡家道本豐因終日讀書不事生產  
且好義輕財故中歲而產卽罄平日常冠垢敝涕唾  
不擇地而揮有所感觸則手揣心摹佇立如塑俗人  
雖非笑之弗恤也晚年好道將歿預知時至卒年六  
十四著有半野齋詩稿藏於家子鳳翔庠生

汪芬字古香父成德年老好施家道中落芬游庠後  
乃經營米業不數年家道稍裕以商務授其仲弟復  
下帷攻舉業同治丁卯登賢書中歲以截取知縣加  
道銜不仕知州龔延請總董同善堂各善舉新創水  
北長湖義渡所訂規則頗完善事事綜覈名實歛無  
虛糜秉性廉介不爲苟同後厭紛家居知州章再三  
敦請不出光緒甲辰重游泮水卒年七十八  
李佩珣字東玉號少泉績學敦品性傲岸不諧於俗  
爲諸生時館於儀徵陳侍御彝家卞中丞寶第託陳  
介紹請見珣辭曰匹夫貴自立無故晉接公卿非義

### 三續高郵州志卷四

獨行

五十

也卞聞而益重之旣而夏編修子錫督學川中敦請  
襄校試卷在川路拾奇石用以鎮卷歸時置石原處  
並不攜回同治癸酉領鄉薦公車再上不遇教授鄉  
里聰慧者經其指授多掇巍科魯鈍者恆苦其卓每  
不卒業而去老而益困處之泰然雖對契友口不言  
貧足跡不至公府錢州牧錫賓造廬請見避弗面歲  
暮錢饋以酒珣報以詩卒不往拜生平長於詞賦格  
律謹嚴有六朝唐人風調古近體及長短句皆無俗  
韻嘗賦百花詩寄託深遠以示其友友謀付梓珣卽  
自焚其稿其孤介如此卒年六十餘

詹廷玉字子衡臨澤鎮人少穎悟弱冠入邑庠授徒  
鋤口暇則飲酒賦詩以自娛家無儋石從不以升斗  
千人鄉里高之

陳錫麇字子仁廩生性端慤嚴義利之辨家貧或勸  
之捐貢以廩缺與人可獲重酬曰貧命也名器可沽  
哉千佛菴劣僧某父老就錫麇謀逐之易尼住持事  
定酬以金錫麇曰逐以其劣逐而受酬是爲酬也卒  
不受平日工文績學著有易經精義春秋精義類編  
待刊卒年四十一

人物志

義行

明張得常公田村人家富好施洪武中充本邑糧長  
歲饑艱於墊繳因以遲慢獲罪遣戍遼東既而南歸  
整頓先業富過於舊正統庚申大饑戶部主事鄒來  
學奉命賑濟得常輸粟四百石充賑欵有司上狀命  
蠲一門丁役州同知鄒淵勒石旌之孫繼字宏善博  
涉經史不事浮華嘉靖二年歲旱捐粟三百石

前志  
義民

條下作  
二百石

以賑饑復於本鄉賑粥凡六月老稚得以就

食知州謝在旌其廬曰尚義之門繼孫曰應文字汝

三續高郵州志卷四

義行

五十一

謨由太學生任廣東增城縣主簿每歲暮必分給粟  
米於里人隆慶三年大水輸粟一百五十石賑濟朝  
命加知縣銜以榮之

張經字宏載本非郵產幼鬻於富人張士珍爲僮珍  
父得常曾獲罪戍遼東既而留僕頂名應役私自還  
南而卒珍既承父業以經秉性誠篤寄腹心焉經遇  
主疾服勞終夜不倦珍子或有過輒規正之一日見  
珍有憂色私問其故珍歎曰汝在吾家久忘先代遼  
東事乎異日清查戶口必勾取補役我與兩弟一子  
例有一人應之骨肉離散心何以安經曰身蒙撫養

異日請代斯役珍不許經以死自誓必報主德珍感其誠從之遂以經爲養子分給家資與己子無異後於嘉靖中果勾取經子滿補役焉

以上二條採張氏家乘

夏稻字國珍力田而好施於農業富有經驗子嬰河北有板荒田數百頃稻次第規畫不數年開墾成熟歲穫萬餘石凡遇凶荒悉賑貧乏里有避差徭而匿者稻每代輸其費於官俾後復歸免受鞭朴州人推爲善士屢舉鄉飲大賓

北鄉夏氏家乘

清華立基字承緒號靜庵諸生道有遺金得之仍返諸其人時稱長者乾隆丙午歲荒偕同學朱江金葆

### 三續高郵州志卷四

義行

五十二

初等力請賑濟卒年八十三

感舊集附傳

李淮字石生附貢生爲同善會館塾師嚴而有法常提倡文會集年少生童課之延請邑中名宿輪爲評閱成就者極多弟江字子山天才亮特爲文無論駢散下筆千言皆合家數中咸豐壬子經魁唯貧而不修邊幅世俗嗤之淮每戒之且節館穀以相助而江則清狂如故淮不與較其友愛如此

耿坦字履平其先天長縣人父龍門以文無害爲州吏占籍高郵子六人坦其仲也以經商起家累貲鉅萬性好施捨凡邑中慈善事悉慨然以整頓爲已任

道光十八年捐貲獨造湖船二隻以救生越三年偕  
貢生王澁勸捐興復恤嫠會又倡設四門義學明年  
偕職員李大德經辦城工就月城隙地捐貲造市房  
取租充恤嫠經費又偕監生陸遐齡創建救生公局  
明年修整康澤祠前義渡又明年獨創立貞堂訪城  
鄉嫠婦之無依者居以待老並設濟廢會  
後改為廩  
癰警局  
給疲癃殘疾之夫明年捐增保字號救生船郵之紅  
船凡四坦蓋手創其三焉凡諸善舉坦既捐田若干  
畝或錢若干貫以爲之倡更集各紳富捐欸存典生  
息以圖持久法良意美迄今董其事者猶遵其法其

### 三續高郵州志卷四

義行

### 五十四

治家儉約整齊兄弟早世撫養三孤姪各執一業均  
有渠範由監生以捐輸議敘州判又以防堵功奏給  
六品職銜年五十八卒

王琳字崑源監生授三品封職生平勇於爲義左青  
峙刺史信任之道光間倡捐鉅欸修葺南門城工董  
理育嬰堂實力任事嘗於永清寺旁設惜字社贊化  
宮旁設施藥施棺局獨捐田數十畝爲經費至今賴  
之弟珍字獻廷尤熱心育嬰舊章嬰逾三歲卽提減  
其食之半珍呈請州牧給示勒石永不提減凡邑中  
災賑團防與兄協力襄助共著賢勞琳子炳智自有

傳

陳文灝字效梁監生世居界首鎮父鯨以經商起家文灝嗣之慷慨好義道光間嘗創設生字號紅船在界首湖面救生戚串間有孤女撫而嫁之貲從與已女無異族兄爲河員誤工罪幾不測文灝鬻腴產數百畝代爲贖罪旣免無幾微德色晚年家中落歿後次子贊平能修其業贊平字勦海監生究心醫學精於外科用林屋山人法診治全活無算一介不取兼施藥鄉里稱爲善人年四十餘卒

周定奎字兆登邑庠生性沈默自幼自老手不釋卷

### 三續高郵州志卷四

義行

五十五

咸豐六年歲旱鹽城有鬻妻者已得錢書券矣定奎知之急措貲贖歸俾夫婦完聚後晚行失足落水遇救得活臨澤韋弼諧與友善嘗贈以詩云贖身施隱德滅頂免奇殃卽謂此也

周掄奎字汝材性慈惠道光二十八年水災掄奎在周家巷三元殿設粥廠全活多人咸豐間湖西兵燹避亂者紛集每日煮粥飼之董本里團練捐輸事竭力辦公凡無力認捐者向當道求免以舒民困例得議敘辭不受

周瑞字彩文一字玉光監生居臨澤鎮少家貧棄舉

業習會計有餘卽以周戚里之貧者盡心地方公務於道光咸豐間嘗募一文愿捐社倉穀平糶施棺置義塚設水龍修治橋路奧匪陷揚州郵邑震驚瑞捐金募勇購器械晝夜巡防地方安堵後年七旬餘猶協修車南中新四壩暨東堤踴躍從公實力任事下河一帶咸頌其德

張伯穉字友秋監生父之濫任江寧訓導患疾歸里穉親奉湯藥朝夕扶掖十餘年待兩弟尤厚同治中州牧委充普育堂董事時一弟一姪皆宦遊浙省貽書州牧退董穉曰此嬰兒性命所關何可惜賠累以

### 三續高郵州志卷四

義行

### 五十六

誤生靈乃獨任之董理三年勤於厥職並稟請漕督撥款三千貫另交殷實生息助堂經費從此後董接辦無大累者穉之力也

居喆字駢吉號匠門幼聰穎勤於誦讀弱冠入州庠旋食餼同治甲子舉於鄉以團防工奏保知縣授福建光澤令後改教職選丹陽縣教諭卒於官喆性儉約而孝養豐腆持家有節制居鄉公正一事不苟郵邑積弊向有現年名目擇村氓殷實者承充凡里中未完錢糧悉令現年代繳因而破家斃命者不知凡幾喆應禮部試時與卞庶凝倡議及同鄉京官具呈

都察院瀝陳其害奉旨革除事載再續州志其任光澤時有爭墳山田者歷數十年不決喆爲之發隱摘伏兩造皆服縣中捐輸素多冒濫喆擇其病民者盡去之與搢紳交不受請託人亦無敢干以私暨司丹陽鐸因病乞假歸歿年六十四

吳杞林字楚山一字梓材少勤學以郡試冠軍遊庠旋食餼更潛心經世學世居湖西閔家橋洪楊亂時陳總兵國瑞駐防其地聞杞林名事以師禮陳驍勇而性嗜殺左右小不如意輒戮之無敢諫者杞林於其請講孟子時注意不嗜殺人一語反覆開導陳感

### 三續高郵州志卷四

義行

### 五十七

悟自是頗戢凶威曾文正公謂國瑞嘗親近名儒卽謂此也寇平陳將去列杞林名於薦牘並餽以金皆不受第勸陳於功成名立後學道謙讓克保令終而已陳服其高歎息而別同治庚午杞林舉於鄉僅一上公車不復作出山計專務裁成後近居鄉於地方利害知無不言光緒初漕督有實堵三河修復滾壩之策杞林上書數千言痛陳淮甸數百里堤壩閘洞利弊議未果行又嘗請設巡湖水師創立長湖義渡開楊陸橋大河重修珠湖書院皆實力提倡生平篤於故舊陳總兵國瑞歿後奉詔建祠湖西杞林以大

耆之年親董建築並規畫祭田爲久遠計其處家事  
兄桂林尤恭訓諸姪無異己子嘗與族弟玉堂共建  
宗祠晚歲築棲隱山房朝夕徜徉其中猶讀書不輟  
光緒甲辰重遊泮水次子雲程貢成均孫濬湘同食  
餼曾孫曾啟入學四世同時與膠庠有關係閭邑傳  
爲美談是年冬卒年八十四著有讀史兵法棲隱山  
房詩鈔待梓再續州志亦半出其手焉

郭鴻熙字雅南廩貢生少應童子試於泰州旣取進  
將覆試矣母卒於家訃至其戚某挾隙鳴於學使者  
遂撤換喪畢再試乃遊庠後其戚歿戚子匿喪而試

### 三續高郵州志卷四

義行

### 五十八

竟冠一軍心畏鴻熙之報復親往謝之鴻熙曰爾先  
人之不德於爾何尤吾終不以爾先人之待我者加  
爾戚子感泣遂亦遊庠以師禮事鴻熙終其身鴻熙  
能文不甚注意於時藝而留心經世之學嘗條陳水  
利於學使者因獲冠軍又嘗獻所編左氏兵法於左  
文襄文襄亦躋之居鄉嘗創設六漫闡義學以訓貧  
寒子弟卒年八十餘

汪恆字秉卿舉人芬之弟早歲教授邑中生徒多掇  
科名恆以光緒辛巳恩貢選授元和縣訓導嘗捐俸  
修葺元和學宮并於隙地植桑以備歲修之用任十

餘年以蜚語被謫士林爭爲辯訴乃調任荆溪學又數載以老告歸生平好施嘗捐貲邀集同志創立接嬰堂二一在宋家橋一在太平集四鄉踵而行焉闔境遂無溺女者晚歲於水南籌設船塢未成而卒年八十一

車輿字筱湘初名遇清世居臨澤鎮工書法早歲童試列前茅取侑生嗣因兵燹停考納粟成均授徒教子皆有法度居鄉急公好義同治初各處典舖增息至三分滿期亦縮貧民苦之輿率同志公稟江督乃飭本省各典照舊二分取息二十七月爲滿遠近稱

### 三續高郵州志卷四

義行

### 五十九

便子嬰聞石工圯缺歷年啟閉不時民田大失水利輿訴諸漕督修閘設洞農民便之或請於子嬰聞下二十餘里外更造閘一重以蓄水淮揚道已允行矣輿籲請知州申詳下游之受害事乃寢凡饑民到鎮莫蔽風雪輿勸戚友趙貽善出貲建棲流所以安集之舊豐備善愿存欵祇三千緡自輿董理贏至一倍每年冬提息一半設廠施粥餘欵積置腴田兩處至今貧民賴之卒年八十四

丁鏡齋名瀚清以字行明術數之學家貧賣卜於高郵北門凡鄉人來問卜者言休咎畢卽勸以爲善囊

有餘錢買物放生並刷印勸善詩文隨在散布自戊寅訖己丑各省凡有災賑鏡齋皆代勸募集成鉅款涓滴歸公當時督撫李鴻章陳士杰題額獎之郡守何金壽每遇邑紳晉府必問丁先生安否且曰斯人正士也可常聆其教言其見重如此嘗爲鄉人占得吉卦不言其吉同道某見而疑焉待鄉人去詰之鏡齋日子知渠所問事乎蓋將鳴官而決於吾卦如以實告是速之訟也此輩不識法律而畏鬼神言其不吉則廢然返矣況訟則終凶自然之理惡能據一時之龜策定哉聞者歎服然其占卜亦頗有驗淮揚道

### 三續高郵州志卷四

義行

六十

龐際雲嘗以保壩至郵水勢極盛心疑懼就鏡齋占之鏡齋決其無虞已而壩不開而水果減卒年七十餘子瑞昇附貢生能繼父志勸募災賑二十餘年當道鑒其勤劬保舉以縣丞用瑞昇不樂仕進仍以賣卜終其身嘗清晨在關廟側拾紙幣數百千卒訪其主還之以是見稱鄉里宣統紀元邑紳公舉以應孝廉方正制科詔賞給六品銜未幾卒年五十餘迄今子孫猶世其業焉

吳廷颺初名春亭字少鶴文水令超子由廩貢任高淳教諭諸生某以事闕曖昧控其兄於有司不得直

屢具狀於廷颺極口呼冤廷颺爲之述於縣令令乃復召兄弟至庭曲直立判邑人士咸服其公江寧守李廷簫稱其無愧人師調任沭陽縣學未赴任卒王虎溪字笑三一字嘯山廩監生少習制藝規仿先正一洗庸腐之習教授生徒貌嚴而言厲喜培植後進嘗結社趙孝子祠月課文賦倩里中名宿評定甲乙而已督責之如父兄不稍假借因是而青其衿者甚夥邑有立貞堂善舉日形廢弛虎溪獨出貲重建立貞增廣所收養孤嫠聽攜子女入堂嚴定規條所以保全貞節者甚至復於其中設義塾躬教嫠子虎

### 三續高郵州志卷四

義行

六十一

溪家本中人興此義舉不假公款惟聽人捐助人多爲之危虎溪毅然不顧且以捐款設一錢鋪名曰利貞其所獲悉助堂中公用試辦三年收養貧嫠至二十房虎溪旋病終未竟其志後人猶遵其遺法焉王壽堃字蘭舫世居高郵北鄉少孤善事祖父接物和易鄉有善舉知無不爲嘗獨造馬霓河大橋以便行人界首文昌宮門外卽接水田有堪輿家謂必添設照壁乃利本鎮科名壽堃卽獨力創建其他寒無衣死無棺者無不竭力周卹光緒間援例爲同知候補安徽奉委查勘懷甯水災不避炎暑分別災情散

給錢米除公歛外並捐廉以補不足全活甚眾由是見重於巡撫陳彝歷署廬鳳同知鳳陽通判所至剷除陋規力矯俗吏所爲其兼辦無爲州警察因地多火災城內取水不便特捐貲創辦太平水桶事未及竣積勞成疾卒於任所

王壽臧字希仲壽塋從弟光緒初援例爲巡檢補授安徽宣城縣水陽司地多土豪賭風最熾凡文武官吏夙有陋規壽臧獨絲毫不受賄徒稍稍斂迹上游察其廉未滿任卽陞用知縣疊奉差委弗避遠險所至不煩供張潔己愛民嘗幫辦皖北賑捐悉心訪查

### 三續高郵州志卷四

義行

六十一

親行烈日之中日數十里暑不張蓋且捐助己銀千兩徧恤災黎巡撫馮據以入奏欽獎樂善好施匾額後因病請假歸遂不復出居鄉見義必爲凡災賑施粥平糶各善舉皆首輸捐歛臨終但給嗣子以先世遺產凡已續置田畝或撥入宗祠或充地方善舉或變價以分贈宗族故舊下至厮僕皆有犒給焉

周子裕字立之邑諸生性端樸課徒甚嚴無荒晷刻尤好善一日往田收租適佃戶柏某以子亡逼媳金氏改嫁裕力爲勸止出貲百餘貫與柏金氏得以全其節時人稱厚德焉

夏致和字萬育國學生北鄉留寶堽人樂善好施同治五年清水潭決口北下河青苗淹沒村落困水中人多束手待斃致和僱船救濟送至運隄每人贈米五升錢二百俾謀食他方如是者月餘救濟甚眾金天元字普卿監生性誠實素通醫理凡治鄰里病者不取絲毫值待親族極厚生賴以贍養死賴以棺斂凡十餘家光緒間倡辦地方團練獨出貲購器械分給里人其急公好義如此

張匠人名兆喜

府志未載名照張氏家乘補錄

爲張家莊木工父有

瘋疾急則持刀自刎兆喜防之嚴殆而免者數矣既

### 三續高郵州志卷四

義行

六十二

久防少懈縊於其族之門族富室也黠者慫兆喜訴之官可得利兆喜泣曰吾不忍以父死謀人財也竭力營葬哀號盡禮

採續纂揚州府志

龍鎮川居宋家橋道光初弟鎮山與甘泉曹姓忿爭失手斃曹曹氏控諸甘泉縣署訊判抵罪鎮川首官自認凶手與弟鎮山爭死山強辯不得官憐其義從輕論罪遣鎮川戍福建妻亦知義願同往後均卒於戍所唯其養子回籍

詹大魁車邏鎮薙髮匠也少孤事母極孝時進甘旨叔年老無依迎養於家與兄同操業有贏餘多歸之

兄越河頭磚橋爲往來要道年久失修大魁首出錢二十千爲眾倡里人感激積貲重建橋成行人便之魯正周英保王佩蘭皆臨澤鎮人光緒三十三年九月有羣盜攜火鎗行劫正等出力救護升屋擲瓦擊賊相持良久終以手無器械相繼斃於盜

姜慶同盛如海尹廣儒龔萬才鍾步金張松餘皆三埧鎮人宣統元年鎮典被匪白日行劫六人同時鬪死里人哀之立主於義學以祀焉

戴林光緒末郵城地保以巡更錢奉養寡母鄰稱其孝且勤於厥職遇險不避光緒三十年在城北緝賊

### 三續高郵州志卷四

義行

### 六十四

傷足而跛三十四年夜至藥王廟側見數賊行竊又被拒捕身受刀傷數處宣統二年巡更逐賊至南斗壇東北隅爲羣賊所戕

人物志

篤行

明夏曆

前志選舉志作夏律蓋避清高宗廟諱也

字國正延平府同知璫

子少勤學讀書寒暑無間性孝友內行醇備處鄉黨恂恂如也然守正不阿不畏強禦人咸服其剛直登弘治壬子賢書乙丑成進士任樂昌縣知縣有循聲王襲祖字子順號賓橋御史珣五世孫少家貧自傷無以養親乃學爲貨殖以致富性好施濟人緩急與親友有無相通不計償否嘗倡修泰山廟及文遊臺所募無幾皆捐已貲成之州守李公獎其義每歲暮

三續高郵州志卷四

篤行

六十五

置米一囤並銀錢若干躬行里巷見無以卒歲者卽俛助之不令人知其姓名有盜劫其家事發州守召襲祖認取原贓襲祖辭焉且告守曰是皆迫於饑寒今無失主可末減也守感其意貸盜死而諭之曰王某活汝汝曹宜自新也盜皆感泣襲祖身雖布衣爲一郡所推重鄉鄰有爭視其是非爲曲直靡不服者晚歲舉鄉飲大賓子二人慎德載前志孝行傳秉德

庠生

採王氏家乘

王魯字邦賢號竹居援例授將仕佐郎性耿介重然諾動必以禮以服賈起家事親從兄竭盡誠敬待宗

族厚有死而無嗣者獨力殯葬之或陰假其名貸人  
百金事覺訟官魯卽代償毫無愠色里人或負魯債  
不能償則取券焚之鄞人陶實夫館於郵暴卒魯經  
紀其喪送至桐江乃返其好義如此晚歲以齒德見  
推與於鄉飲年六十八卒

採王氏家乘

清葉觀復崇本次子少孤事母戴孝養備至父所遺  
著述極富觀復垂髫卽能遍讀之旣入泮益攻苦絕  
不問家人生產素好施濟歉歲煮糜以賑饑三黨待  
以舉火者常數十人天性豪邁意若不可一世而制  
行純謹不失尺寸以正直聞於鄉中歲而卒次子雲

### 三續高郵州志卷四

篤行

### 六十六

字漢章年十四補諸生試輒高等亦能推廣仁孝周  
郵親黨不及中壽而歿雲有二子長曰尹好學能文  
性尤仁厚外兄陳生有田質於其家向尹乞還尹卽  
與之曰彼貧得此大有益在我不足爲損也伯父穀  
種告乏尹以己田種與之曰伯父老貸無應者我不  
難貸諸人也尹田有洳田鄰徐氏謂尹先世假諸彼  
也尹卽與之曰在渠雖無實據然余聞舊佃曾有此  
說與其留之以滋疑不如讓之以昭信孫虞橋稱其  
立心制行渾然天理告內外子弟曰葉生賢人不可  
不思齊也年未及壯而卒尹弟令行誼載前志孝行

傳 採孫虞橋愛日堂文集

徐諧字尹和諸生家貧以舌耕供菽水兄說困於童試仰事俯畜力恆不逮諧獨任之雖屢空不形於色恐貽親憂且妨兄學也旋患外症自料不起於兩親養生送死之需竭力預爲籌備果未逾年而卒年甫

三十三 採續纂揚州府志

王欽字又勤少孤家貧傭書揚河通判署書法精工司馬嚴公見而異之延爲記室爲人和平勤敏歷游東河南河諸督幕自河帥以下咸敬之歸以貲付兩弟經營養母母歿後不數年盡爲弟所虧折老而食

### 三續高郵州志卷四

篤行

六十七

貧無怨色好蓄古書碑帖手鈔書高二尺許與夏瘦生王寬甫等遊無不仰其高致卒年七十三方兆芹字泮林監生素性仁慈道光十一年大水成災被舉董義賑事乘舟散賑聞野有哭聲躬自往救於饑民按名給貲全活甚眾方伯趙公獎以惠周桑梓額子壘孫古辛曾孫恩霈皆遊庠

陳三復字敬白監生世居永安鎮生平樂善好施道光中水災董義賑事實力從公全活甚眾藩司趙盛魁獎以匾額妻孫氏亦相助爲善壽至百歲子葆附貢生

陸儀字鳴岡監生居三埧鎮業商性寬厚任恤嘗夜  
獲偷兒則所識也予以金縱之去其人卒改悔能自  
立又飯一遊丐知非常人周以貲後數年儀橐重金  
購米皖省路遇盜鄰舟有主僕二人解救之既免其  
主視儀曰君非高郵陸君耶前蒙賜食者某也命其  
僕護送之道光中邑大水儀竭力勸賑多所全活知  
州王澐書惠周桑梓額旌之

周雅字以南樂善好施道光中水災雅出資賑饑活  
人甚多州牧王澐獎以任恤可風匾額

陳朝嵩字宗嶽明平江伯瑄裔孫也瑄後嘗三世爲

### 三續高郵州志卷四

篤行

六十八

總兵故所居曰總兵莊朝嵩工書兼善丹青品行廉  
潔取與不苟雖布衣而負鄉望子瑞芝咸豐辛亥舉  
人

徐寶字百生號芸厂邑增生賦鹿次子天姿聰敏工  
詩古文詞游庠後歲科試屢列優等事母孝患疾必  
親侍湯藥兄賓早故教兩姪恩培達培成立咸豐四  
年粵匪陷郡城董練團防民賴以安著有噴飯集未  
刊子祖培庠生

曹敬字以莊界首人能詩詞性慈善因好施家道中  
落寄居寶邑舌耕爲業有朱仁魁者負債無以償思

自盡敬卽罄館穀周之不自恤其貧也晚境益困處之泰然卒年七十五

林嘉栻字雲城議敘九品少孤奉母孝以勤儉起家與弟嘉楨析產栻皆讓肥擇瘠母好施罄所蓄栻毫無吝惜晚益好道族戚有爭得栻決其是非罔不服卒年八十三

秦亮功字寅清邑庠生母病親奉湯藥歷三載衣不解帶與弟友愛撫姪如子戚族貧乏悉周之曾以房產施送育嬰堂後家中落舌耕餬口鄉閭屢薦不售遂淡於進取與同志相唱酬子三人皆暮年所生卒

### 三續高郵州志卷四

篤行

六十九

年六十七

卞堅字實甫三埧鎮人母早歿事父及繼母以孝聞初應試卽見賞於刺史左青峙入泮後棘圍屢薦不售淡如也課弟庶凝庶諧及子姪輩十餘人成名生徒多所造就品端學邃夏路門太史極欽佩之卒年六十餘子汝勳汝謙皆庠生汝謙字吉孚孝親敬兄戚族中貧苦者多所周濟妻父母無後謙供養終其天年里人稱之

陸文燦字耀南九品職銜性寬仁家殷實里黨戚族貧乏多向告貸無力償者焚其券朱戶部柙贈以望

重耆英匾額子春山字曉峰捐職布政司理問亦急  
公好義有父風

雍承升字芷樓附貢生界首鎮人敏學工文淡於進  
取與里中有品學者友善好施與不使人知家中落  
處之淡如以課子讀書爲樂卒年八十子金章咸章  
鎔章均廩貢生

顧海山字策鼇監生居菱塘橋樸實自持盡心公益  
取與不苟以讀書爲樂課子姪俱成名年六十九卒  
吳增字稚蘭邑諸生父兆熙及本生父兆燕俱工詩  
著有棣華集詩稿增節衣縮食梓之堂姪鍾甲少孤

### 三續高郵州志卷四

篤行

七十

增撫之成立善教子晚歲寬裕樸素如初鄉里咸稱  
其儉德

董觀廷字接三對廷弟也增貢生性誠篤課徒極嚴  
親族子弟有無力從師者觀廷教之成名族女貧無  
以嫁獨出資遣之每遇貧苦嫠婦倡月捐以資養贍  
弟倫附貢生性樸直里有非義者恆面折之俱年未  
六十卒

龔五標字子丰廩貢生工文棘闈屢薦不售持躬正  
直頗勤公益爲人排難解紛恆賠資以息事晚年詩  
酒怡情時戴草笠步田野常言田家自有樂何以功

名利祿爲其恬淡如此

高秦鏡字燭庭號寶齋恩貢生註選直隸州州判秉性誠篤未冠游庠旋列優等食餼父鵬飛因公負欠沒後秦鏡兼營糶糶數載償清充紅船董事日孳孳於救生躬親巡湖不避風雨爲致用學堂提調極力籌備學款至老病辭職猶餘五千餘緡嘗監修文遊臺請撥用學款以泰山廟田租息抵償洪州牧從之古蹟學堂兩有裨益弟心鏡早沒秦鏡撫其遺孤成立戚族間有困難靡不扶助鄉里稱爲長者卒年六十一

三續高郵州志卷四

篤行

七十一

李履清字金波邑諸生居臨澤鎮少孤事母克盡子職館穀所入悉以奉母不敢有私蓄與諸弟析產時以沃產讓弟歷充保甲善愿董事潔己奉公絲毫無染同治時兵燹之後典商長利爲三分履清與同人控諸大吏因得減爲二分貧民便之生平工書法善畫蘭竹亦精眼科

居同庚字與彭家貧好施樂助善舉同治中海州饑民過境適大雨雪數百口饑寒交迫庚施以粥給以稻草鄉里稱爲仁人卒年八十四

徐煥元字廉甫四歲而孤母周氏督學綦嚴學使彭

久餘書茹蘖畫荻額旌之煥元由廩生選同治癸酉  
科拔貢甲戌朝考有介紹入大司農董恂門牆者煥  
元不從旣而董爲閱卷大臣煥元落選循例就職教  
諭選缺碭山未赴任每憶母病爲醫所誤嗚咽流涕  
因習岐黃年四十六卒妻張氏嘗刲股療姑以孝聞  
張金鼈字雲五少習弓馬游庠後以技勇授徒鄰郡  
多從游者同治丁卯舉武科同榜王爲棟卽其門徒  
時人榮之鼈弟國興早歿遺孤連陞鼈教養如己子  
弟長山同治癸酉武舉平日亦熱心公益云

李黻廷字伯黼自幼勤敏精測量估算投効南河擢

### 三續高郵州志卷四

篤行

七十一

永高汛千總保陞守備加游擊銜署湖北黃州衛守  
備旋以詔裁屯衛歸里任僅三月生平諳練河務上  
游恆倚畀之其家先貧後富臨終命嗣子蓋臣建宗  
祠並以田產散給族親育嬰立貞皆捐助千緡卒年  
七十

馬維高字薇臯一字裕亭先世皖之和州人父萬清  
因洪楊之亂遷郵維高幼穎異年十一能屬文以家  
貧不果讀年十四父命學賈於清河維高在肆稍暇  
輒覽書史樞字帖由是長於尺牘刻燭寸許能草就  
十餘函無少訛誤會捻匪過清河肆人皆遁維高獨

留寇退肆主先返見簿記欸項一無損失乃以全肆商業相寄託時維高年十九操奇計贏算無虛發且性伉爽重然諾由是信義著於江淮間所至爭迎之中年家道稍裕待弟妹戚屬推食解衣無使缺望尤重友誼急人之難雖千金無吝色晚歲子士杰官京師屢請迎養不就凡本邑育嬰義倉紅船恤嫠諸善舉擘畫經營不遺餘力尤精建築邑中文廟學校名蹟凡有工作經其監造費省工堅平日尤潛心子平堪輿之學皆有精到處卒年七十三

李觀政字伯純監生性孝友順承親志家有祖遺房

### 三續高郵州志卷四

篤行

七十二

產悉聽兄弟主持政不與爭親族皆稱其讓教其二子甚嚴卒皆有聲庠序

葉慶鶴字駕軒臨澤鎮人家貧母早歿躬執爨以養父嗣習藥業薪資悉以供父性誠篤東道任之終身中年稍裕有告貸者概弗吝弟貧復贍養之妻汪氏亦賢淑善於教子里人稱爲賢母

賈承誥字鸞臺都察院經歷常生子附貢生捐職州同嘗創辦三埏鎮接嬰堂偕同志捐貲以供經費又與王金城等同創贊化學堂眾推爲管理員旋因長子繼宗歿悲悼辭職復舉充官立高等小學校長任

事二年亦辭職歿年六十一著有廬山樵唱集待梓  
陸吉人字藹亭光緒戊申歲貢居三埧鎮父策鼇嘗  
募款創設粥廠吉人能承其志接辦始終不懈嘗爲  
人排難或酬以重金不受強之再三卒施入粥廠爲  
基本金卒年六十餘

李勳字茂先監生少有至性父病刲左臂以進邑有  
南藥局捐資修理善舉賴以不墜爲人樸愿嘗出鉅  
資經商不數年悉爲駙僧所乾沒以是老而益困年  
六十餘卒有鄰媪哭之哀詰之則勳嘗於某年還其  
遺金也其隱德類如此

### 三續高郵州志卷四

篤行

### 七十四

謝連元字掄卿監生少孤貧出繼別房事嗣母以孝  
聞中年勤儉自持家稍裕伯叔窮無所歸者皆依以  
存活兄嫂故連元爲營殯葬甚豐族中子弟無力讀  
書者多所資助卒年七十七

萬錫康字晉侯邑庠生善書八分得其曾祖春之筆  
法父成勳病痰喘艱於唾康吸而出之十數年如一  
日課讀自給足不至街市與人無欺言笑不苟有古  
君子風年六十餘卒

張其衷字牖生監生捐職州同自幼出繼堂叔善事  
嗣父母及本生父母視諸弟妹一體天性孝友人無

間言嗣父充董本邑善舉其衷繼之勤慎從公以承先志年六十餘卒

周覲墀字崑樵廩生幼失怙母高氏撫之成立覲墀事母先意承志疾病殫心醫藥衣不解帶性嚴謹慎交遊儉於自奉惟善舉無所吝周給貧乏或致典質什物究心岐黃不輕試然遇貧寒則醫藥兼施亦多所全活從兄翼墀號藕舫工書善鐫刻邑庠生

徐春熙字煦齋監生其先自寶應徙郵北鄉熙少孤事母孝光緒初家中落乃縮食節衣躬耕以供甘旨有餘則爲慈善事凡恤孤寡振困窮修道路施衣棺

### 三續高郵州志卷四

篤行

### 七十五

知無不爲三黨中貧乏者尤加周卹有孀姊貧養贍之終其身並撫外甥成立婚娶爲人謹飭而退讓卽或加以不堪亦坦然絕不與校故畢生未嘗一至公庭鄉里推爲長者

吳鳴謙字益堂監生塔兒集人多才能急公義光緒中湖西旱荒鳴謙稟請公欵自備旅費親歷各村散賑又請撥倉穀助民籽種鄉里患盜與邑人吳杞林請左督宗棠撥礮艘巡湖並湘軍駐防陸地後聞有移防信又稟求漕帥挽留南北奔馳積勞成疾而歿

年五十四

吳廷勳字鼎銘業農嚮學無力從師以好問經書成  
誦能詩文應試不售爰習醫善治奇疾性廉介好施  
與邑有塘河大橋傾圯行人苦之廷勳捐款督工橋  
成歲必捐貲修整其好善如此

三續高郵州志卷四

篤行

七十六

人物志

藝術

呂光字坦齋乾嘉時人修眉赤面長髯始爲畫無足觀後游大行歷燕趙南遊徽歙探奇三十六峯藝乃大進畫黃山圖全冊頗爲鉅公賞識終身不娶得錢半給姊姪半付承天寺僧與人交憨直有持白鏹求畫者一語不合擲鏹逐客而閉其門嗣姪孫學不能盡其傳逐之後復來學得其緒餘筆亦不俗光晚年草笠鳩杖朱履游城市中人呼曰山人所遺畫人頗珍貴焉歿卽葬承天寺側

夏紀堂古茶移遺文

三續高郵州志卷四

藝術

七十七

楊濬字紫溪監生世居臨澤鎮嘉慶時人善畫山水尺幅寸頁人咸寶之與甥吳楚淇最相得楚淇書仿聖教序濬自以爲不如每畫成必招楚淇題句兩美合并求者愈多焉

潘淳字樸庵善繪人物山水丈幅尤佳子震字位東亦善繪事翎毛花卉俱工

龍雲龍字雨田鯤之曾孫精繪事其神韻綽有祖風緒少懷字用恩習醫術尤精幼科揚河廳張襄子痘症危險諸醫棘手延少懷診治應手奏效張書楹帖贈之由是著名子思上字念劬紹父業並善婦科參

考各家多心得著有家傳秘錄待梓

張樞字撫辰道光時人習醫術精研難經直窮其秘  
爲人診視必得病源村人因患風孿誤食蛇肉不化  
腰間如束帶氣塞垂危樞以白芷焦查俱近勛與之  
服病立解類此甚多著有醫學摘要待刊

採界首張  
氏家乘

宋侃字質夫其家先世曰鼻曰茂初皆精篆刻侃承  
家學金石刻畫古秀絕倫著有稽古山房印譜頗見  
重於當時王石瘿序而行之同邑夏澂字竹甫幼敏  
慧習篆籀及秦漢以來各體書亦工鐵筆章法與錢  
塘陳曼生相近著有竹子氏印譜並能詩著有雲萍

### 三續高郵州志卷四

藝術

七十八

吟塞北吟伴梅癡語金石偶臨新竹廬雜筆

薛成琳字虹如又號飲虹子知天文占驗多奇中精  
算術及西人機械之學並善繪人物有唐宋人法由  
監生以軍功官同知候補東河署黃沁廳同知光緒  
八年卒於官

臧仁壽字殿卿弟保壽字錫五世居永安鎮家自明  
季卽業瘍醫閱十傳至其父明德名乃大噪明德善  
鍼灸能治奇症某納涼籐陰下一日背奇癢明德謂  
內有蟲蟲以鐵圈炙紅按患處潰其皮膚鉗出小蜈  
蚣數十而愈仁壽性尤警敏習父方書參考諸家業

乃愈精爲人治搖頭症前醫或平肝或瀉火無效仁  
壽命取家鳧最老者食之至四十九隻而愈有某姓  
兒於酷暑時忽肢體攣曲仁壽曰此中寒也解其衣  
置蒲包中陳於日曬之熱地反覆按摩良久兒乃大  
啼汗出病解其神效如此並以術授保壽有北方僧  
頭腫如斗醫莫能辨保壽謂其病根在下部僧不之  
信復診於仁壽仁亦云然僧乃聽治保壽因縛之於  
柱鍼刺尾閭出膿數碗而愈又有發背潰成百餘孔  
膿出不暢病者神昏己不覺痛保壽令仰卧繩床床  
下對瘡口熾炭撒末藥取濃煙熏之良久病者覺痛

### 三續高郵州志卷四

藝術

### 七十九

乃撤炭另敷以藥次日膿大出漸次脫腐生新半月  
全愈保壽由是與兄齊名明德著有臧氏珍囊仁壽  
著有臧氏外科治驗錄待梓

陳載元字次軒監生幼聰穎而體質不强於奕獨有  
神悟一時稱爲高手家本衛籍常督運北上長途汎  
舟吟咏不輟著有篷背吟稿待梓

盧懷園字玉川監生居北鄉老人橋精醫術善治婦  
人小兒有張姓兒患痘無漿垂斃園用人糞以秘藥  
治之痘卽含漿嗣因痘痂不落復用麻黃兩許並他  
藥佐之一服大汗痂卽盡落著有痘學條辨醫學撮

要心法摘要盧氏新編醫學雜集藏於家並善撫琴  
工詞曲性不苟取雖道盛行而淡泊如故也子僕亦  
以醫著名並耽吟詠著有越人吟待梓

林侖字克揚監生通天文並究心青烏術暇卽繪圖  
立說闡發甚深一時習堪輿者皆莫能及惜其書不  
傳

吳體元字守善監生業瘍醫壯遊江浙遍訪名流辨  
識藥草年四十後始歸娶爲人療治諸症多效蘇州  
衛李某患惡瘡誤服輕粉取效一時後毒復發遍體  
潰爛體元與以丹丸數十粒一月而愈晚年好道有

### 三續高郵州志卷四

藝術

八十

莊老之風

採續纂揚州府志

王宗幹字慕柳少孤貧讀書未成依嫂度日幾至嫂  
不爲炊幹發憤外出卜於神前得籤句云一事無成  
學九成幹感悟遂刻志學九成宮帖未半載書法漸  
佳乃學柳公權書得其神似因自號慕柳由俊秀保  
舉任裏河同知光緒中卒

趙履鼇字海仙郵籍寄居興化祖術堂父春普兩世  
以孝行旌表皆精醫術活人無算履鼇幼聰穎承家  
學讀內難諸經皆有神悟弱冠名卽大振善治奇症  
有楊姓病冬溫疔毒卒然走散頭大如斗神昏譫語

服大黃重劑犀角涼劑皆不效履鼈投以辛涼輕揚之品一服霍然州幕周某病劇履鼈謂氣虛症實攻補兩難令製銀喇叭管透入穀道用麻油導之一瀉而愈江西某學使夫人懷妊四月患癰閉腹滿氣塞延履鼈至勢已危殆履鼈閱前醫諸方非利水卽補氣皆非所宜獨遵內經衰其大半之法開鬼門治之因重用麻黃取汗腫脹俱消興化某僧冒暑歸菴覺眉睫間若癢若酸遍身毛竅血卽湧出諸醫不識何證履鼈曰人行烈日中血爲暑邪所逼散溢於外此經所謂肌衄也早治尙可活乃飲以當歸補血湯引

### 三續高郵州志卷四

藝術

八十一

用簷際垣衣並以地衣敷之而愈淮安呂姓子頭面腫大咽喉閉塞寒熱頭痛時醫皆云熱毒投以涼劑增劇履鼈辨爲時毒邪氣在表得汗乃生以雄雞冠血炒牛蒡子治之果汗出而病解履鼈有孫初生兩目障翳如青矇彌月不消人咸謂無復明之理履鼈令取蜘蛛目和地栗汁每日飲之數月障翳全消其靈妙類如此每遇疫癘施濟甚溥光緒戊子興化霍亂流行患者死不旋踵履鼈特著霍亂辨症一篇用雞屎白散加味治之應手而愈壬寅興化復患癘螺痧履鼈論此乃霍亂之一種誤認爲痧沿襲常治禍

人不淺仍用雞屎白散加熟附片治之全活甚眾享  
盛名三十餘年終歲舟車絡繹踵門求診者不絕戊  
戌德宗不豫詔舉天下名醫江督劉忠誠公舉以應  
詔適履鼈有疾辭不赴甲辰張文襄公在鄂邁疾遣  
使者至興化迎之履鼈已病重不能行未幾歿著續  
辨症錄未終篇

欣湛然字露文監生世爲名醫至湛然而術益精博  
覽古今方書而不泥於成法凡遇疑難重症無不應  
手奏效名遍天盱滁泗間踵門求醫者日不暇給著  
有集試秘覽二十卷皆生平試驗心得之良方藏家

### 三續高郵州志卷四

藝術

八十一

待梓

楊壽鴻字楚汀邑諸生善繪事筆墨秀麗尤工蘭竹  
吳鑑字鏡湖武生性閒雅善奕喜畫蘭竹頗有丰致  
精傷科善按摩凡傾跌傷筋骨者經鑑手治立愈  
沈性忱字子陶廩生與王恩培賈思慎友善皆工技  
擊精傷科所治立效又善爲人戒鴉片煙並施以藥  
所濟甚眾

郭蓮生字小溪天資甚敏自號蓮花道人畫人物得  
黃瘦瓢法見者無不歎賞

劉含珠字傑夫善算術尤精建築工程學以河營千

總監建本邑風神廟修左公閘及築車邏南關壩工  
并承辦堰盱高郵永安等汛東西堤磚石土工光緒  
丙戌投効臺灣適巡撫劉銘傳清釐田賦丈量需材  
遂以精於測算見知委辦臺南清賦局臺北工程局  
改保文職以知縣留臺補用著有測算圖說博採中  
西測量算法彙爲一編待刊

裘銛界首鎮東農家子也其父嗜奕銛亦學之未匝  
月鎮之人無與敵者夏路門太史聞其名因招致門  
下揚州周小松國手也嘗客太史家銛與對局周僅  
能授以二子他客雖授四五子猶不敵也太史因字

### 三續高郵州志卷四

藝術

八十二

銛曰奕鋒云

王福基字心田臨澤鎮人少業儒精研醫學凡疾之  
險怪者診之輒應手效門庭若市而心迹淡然貧病  
之家招之立至奏技數十年里中全活者甚眾  
翟璲字小東監生寄居寶應幼業儒精醫學名噪一  
時生平喜吟詩善隸書畫蘭竹著有椒櫞書屋詩鈔